




廣州府志

ル 5  
1212  
29









門 儿 56  
號 1212  
卷 29



廣州府志卷七十七

前事略三 宋元

宋

六年三月廣州獻黃芝一本九莖 宋史五行志

七年交趾遣使乘象入貢詔留象廣州畜養之 宋史交趾傳

廣連都巡檢使楊允恭討海賊平之 黃通志

允恭以殿直掌廣州市舶自南漢之後海賊子孫相襲州縣苦之允恭因部運人奏其事太宗即命為廣連都巡檢使賊有葉氏者眾五百餘往來海上允恭集水軍造輕舸掩襲其首斬之餘黨棄船走伏匿山谷允恭伐木開道悉殲焉賊寇每遇風濤則遜止洲島間允恭領眾涉海捕之殆盡賊皆望風奔潰 宋史楊允恭傳



八年廣南轉運使王延範以罪誅黃通志

王延範江陵人形貌奇偉喜任俠富於財父保義為荆南高氏行軍司馬高從誨奏署延範太子舍人從誨孫繼冲入覲薦為大理寺丞累遷司門員外郎太平興國七年為廣南轉運使嘗通判梓州有杜先生以左道惑眾謂延範曰汝意有所之我當陰為之助延範心喜復為江南轉運使有劉昂賣卜於市謂延範曰公當偏霸一方又有徐肇為推九宮得八少一驚曰君侯貴不可言前戎城主簿田辨相延範曰君是坐天王形即日當乘四門輦至是有豹入其公宇噬傷數吏從者不敢進延範拔戟刺殺之益以自負與廣明掌務殿直趙延貴將作監丞雷說觀天象延貴指西方大星曰此謂火星入南斗天子下殿走者也雷

說出星經證之乃太白徑南斗延貴認為火星也日夕與掌市舶陸坦議發兵令坦代歸延範寓書左拾遺韋務昇偵朝廷機密延範奴視僚屬懷勇小將張霸給使轉運司延範仗之霸知延範與知廣州徐休復不協詣告延範謀不軌休復馳奏之太宗遣高品閻承翰乘傳令轉運副使李瑄暨休復雜治具伏與昂辨坦俱斬廣州市延貴等皆抵罪宋史王延範傳

謹案王延範傳但云太平興國七年為廣南轉運使其叛逆不知在何時徐休復傳作九年然太平興國實無九年也黃通志載在八年後今從之

雍熙元年六月遣使按察廣南獄訟宋史太宗紀

十二月罷嶺南採珠場宋史太宗紀



開寶中平嶺表擇廣州內臣之聰警者得八十人合於教坊

習樂藝賜名簫韶部雍熙初改曰雲韶部文獻通考

二年閏九月詔曰嶺南之俗民嫁娶喪葬衣服制度委所在

長吏漸加戒厲俾遵條式其殺人祭鬼病不求醫僧置妻孥

深宜化導使之峻革

東都事略 太宗本紀

四年遣使按問嶺南路刑獄

宋史 太宗本紀

端拱元年廣州言占城夷人忽宣等族三百一人來附

占城傳

八月鳳凰集廣州清遠縣解合歡樹樹下生芝三莖

宋史 太宗本紀

淳化元年二月除嶺南諸州漁禁

宋史 太宗本紀

大食國遣其副會長李亞勿來貢其國舶主蒲希密至南海

以老病不能詣闕乃以方物付亞勿來獻詔賜希密敕書錦

袍銀器束帛等以答之

宋史 大食國傳

五年南海商人獻吉貝布

黃通志

布畫海外蠻國及猩猩圖玉帶上於北苑召近臣觀之

玉海

至道元年十二月廣州大魚擊海水而出魚死長六丈三尺

高丈餘

宋史 五行志

占城遣使李波珠奉表言臣本國有流民三百散居南海曾

蒙聖旨放還今有猶在廣州者本國舊有進奉夷人羅常占

見駐廣州乞詔本州盡數點集兵籍付常占令造船船乘便

風部領歸國冀得安其生聚以實舊疆上遣使詣廣州詢問

願還者悉付波珠

宋史 占城傳

大食國舶主蒲押拖黎齋蒲希密表來獻引對於崇政殿譯

者代奏云父蒲希密因射利泛舶至廣州迨今五稔未歸母

令臣遠來尋訪至廣州見之具言前蒙皇帝聖恩降勅書賜



以法錦袍紫綾纏頭綾絹二十疋令臣奉表來諭以方物致

貢

宋史大食國傳

二年閏七月廣南諸州並大雨水

宋史五行志

三年二月廣東轉運使康戩獻紫芝

宋史五行志

真宗咸平六年五月知廣州凌策上海外諸蕃地理圖

海玉

景德元年六月詔罷廣州軍貢承天節自今三千里以外者

罷之

宋史真宗紀

四年宜州賊寇廣州安撫使曹利用討平之

黃通志

知宜州劉永規馭下殘酷軍校乘眾怨殺永規叛陷柳城

縣分兵掠廣州以曹利用為廣州安撫使利用至嶺外遇

賊武仙縣遂斬首以徇嶺南平

宋史曹利用傳

上語近臣曰番禺寶貨雄富賊若募驍果立謀主沿流東

下趨廣州則為患深矣遣內侍高品周文質使廣州監屯兵會鄰路巡檢使控要路集東西海戰權扼端州峽口

宋史

張繼能傳

大中祥符元年十月令廣南劉氏子孫未食祿者聽叙用

宋史

真宗紀

五年十一月廣州獻芝草二百三十七本

宋史五行志

廣州言大食國人無西忽盧華百三十歲耳有重輪貌甚偉

異自言遠慕皇化附古邏國舶而來詔就賜錦袍銀帶加束

帛

宋史大食國傳

九年秋八月廣州嘉禾生

黃通志

廣州民劉吉妻產三男

宋史五行志

謹案黃通志載此事於景德九年誤



仁宗天聖二帝罷廣南貢異花黃通志

廣南歲進異花數千本至都下枯死者八九道路苦其煩

擾廣東轉運使黃震奏罷之宋史黃震傳

三年廣州司理參軍陳仲約誤入人死有司當仲約公罪應

贖帝謂審刑院張揆曰死者不可復生而獄吏雖廢復得叙

官命特治之會赦勿叙用宋史刑法志

六年四月詔罷廣州貢柑黃通志

明道二年六月錄劉鋹後宋史仁宗紀

慶歷三年知廣州魏瓘築州城黃通志

五年七月十四日廣州地震宋史五行志

皇祐四年四月廣源州蠻儂智高反五月智高陷邕州圍廣

州命知桂州陳曙率兵討智高前尙書屯田員外郎直史館

楊敞體量安撫廣南提舉經制盜賊事余靖爲廣西安撫使

知桂州命同提點廣東刑獄李樞與陳曙討智高廣東轉運

鈐轄司發兵援之七月命余靖經制廣南盜賊事智高引衆

去廣州廣東兵馬鈐轄張忠知英州蘇緘邀擊於白田忠戰

歿廣東兵馬鈐轄蔣偕又敗於路田宋史仁宗紀

仲簡知廣州儂智高犯邕州沿江而下人告急簡輒囚之

仍榜於道敢妄言惑衆者斬以是人不得復爲避賊計比智

高至始令民入城民爭道競以金帛遺闔者相蹂踐至死

者甚衆其不得入者皆附賊賊既去以其能守城徙知荆

南旣而言者論之遂落職宋史仲簡傳

王罕爲廣東轉運使儂智高入寇罕行部在潮廣州守仲

簡自圍中邀罕罕報曰吾家亦受困非不欲歸顧獨歸無



益當求所以相濟者遂還惠州簡卒三千方舟建旗伐鼓作樂順流而下將至廣悉眾登岸斬木為鹿角積高數仞營於南門智高戴黃蓋臨觀相去三十步見已嚴備不敢犯罕徐開門而入智高遂解去

宋史王罕傳

賊方圍廣州蔣偕馳傳十七日至城下戰士未集會儂智高徙軍沙頭安撫楊旼檄偕焚糧儲退保韶州後軍次賀州太平場賊夜入營襲殺之初偕入廣州即數知州仲簡曰君留兵自守不襲賊又縱步兵馘平民以幸賞可斬也簡曰安有團練使欲殺侍從官偕曰斬諸侯劍在吾手何論侍從至是簡救不力言者論之遂落簡職

宋史蔣偕傳

初魏瓘築廣州城鑿井蓄水作大弩為守備及儂智高攻城甚急且斷流水而城堅井飲不竭弩發輒洞中賊勢稍

屈知英州晉江蘇緘始聞廣州被圍謂其眾曰廣與吾州密邇今城危在旦暮而恬不往救非義也乃蒐募壯勇合數千人委州印於提點刑獄鮑軻夜行赴難去廣二十里駐兵黃師宓為賊謀主緘使縛其父斬以徇賊聞之喪氣時郡民皆旁緣為盜緘得六十餘人斬之招懷其驅脅註誤使復故業者凡六千八百餘人城被圍日久戰數不勝賊方舟數百急攻南城番禺令新喻蕭注先自圍中出募得海上疆壯二千餘人以海船集上流未發會颶風起縱火焚賊船烟燄燭天大破之即日發縣門諸路援兵及民戶牛酒芻糧入城而轉運使成都王罕亦自外募民兵入城益修守備賊知不可拔圍五十七日壬戌解去由清遠縣濟江擁婦女作樂而行攻賀州不克遇廣東都監張忠



於白田忠戰死虔州巡檢董玉康州巡檢王懿連州巡檢張宿合州巡檢趙允明監押張全司理參軍鄧冕皆歿先是緘與洪州都監蔡保恭以兵八千人據邊渡村扼賊歸路忠自京師至奪而將之臨戰謂其下曰我十年前一健兒以戰功為團練使爾曹勉之於是不介馬而前先鋒遇賊奔忠手拉賊帥二人馬陷瀟不能奮遂中標鎗死續資治通鑑

詔加廣南東西路安撫使以知英州秘書丞蘇緘為供備庫使初廣州以賊遽至不及清野故賊得肆掠後緘知賊將走分兵扼其歸路布槎木巨石凡四十里賊至果不得前乃繞出數舍入沙頭渡江由清遠縣道連賀州西歸摧傷甚眾緘盡得賊所掠去物續資治通鑑

八月以魏瓘復知廣州黃通志

初瓘知廣州築城環五里疏東江門鑿東西澳為水閘以時啓閉焉儂智高寇廣東西獨廣州城堅不能下於是論築城功遷工部侍郎集賢殿學士復知廣州兼廣東經略安撫使給禁卒五千聽以便宜從事宋史魏瓘傳

以蕭注為禮賓副使仍權發遣番禺縣事續資治通鑑九月命余靖提舉廣南兵甲經制賊盜事以狄青為宣徽南院使宣撫荆湖提舉廣南經制賊盜事宋史仁宗紀

儂智高反邕州乘勝掠九郡以兵圍廣州朝廷方顧南事就喪次起靖為秘書監知潭州改桂州詔以廣南西路委靖經制宋史余靖傳

楊旼曹修經制蠻事師久無功改命孫沔及余靖等帝猶



以為憂問宰相龐籍誰可將者籍薦樞密副使狄青亦

上表請行改宣徽南院使荆湖南北路宣撫使提舉廣南

東西路經制賊盜事續資治通鑑

十一月詔免江西湖南廣南民供軍需者今年秋租什之三

宋史仁宗紀

五年遣使撫問嶺南將校賜軍士緡錢二月赦廣南凡戰歿

者給櫬槨護送還家無主者葬祭之賊所過郡縣免其田租

一年死事家科徭二年貢舉人免解至禮部不預奏名者亦

以名聞宋史仁宗紀

嘉祐四年十月廣東轉運使榮諲治棧道於清遠黃通志

廣有板步古河路絕險林箐瘴毒諲開滇陽峽至泚口古

徑作棧道七十餘間抵清遠趨廣州遂為夷塗宋史榮諲傳

海賊鄂鄰犯南海廣州兵討平之黃通志

袁抗擢提點廣南東路刑獄浙東叛卒鄂鄰鈔閩越轉南

海與廣州兵逆戰海中值大風有告鄰溺者抗獨曰是日

風勢趣占城鄰未必死後果得鄰於占城宋史袁抗傳

英宗治平四年知廣州呂居簡始陶甃發城黃通志

先是盧士宏知廣州或傳安南舟數百泊海中將為寇嶺

徼驚搖士宏灼知其非是日從賓客宴遊為樂民賴以安

至是居簡陶甃發城以防之人以為便宋史呂居簡傳

神宗熙甯元年占城王遣使貢方物乞市驛馬詔賜白馬一

令於廣州買驛以歸宋史占城傳

二年知廣州張田築東城黃通志

廣舊無外郭民悉野處田始築東城環七里賦功五十萬



兩旬而成宋史張田傳

六年知廣州程師孟築西城黃通志

州城舊為儂寇所毀他日有警民駭竄方伯相踵至皆言土疏惡不可築師孟在廣六年作西城及交趾陷邕管聞

廣守備固不敢東宋史程師孟傳

七年六月廣州鳳凰見宋史神宗紀

熙甯七年有鳳凰飛集於法華寺羽毛五色光彩陸離高六尺長九尺百鳥隨之食頃從西北去觀者如堵程公師

孟以聞南海百詠

九年正月遣使祭南海告以南伐宋史神宗紀

謹案是時交趾陷欽廉二州遣郭達討之

十年二月赦廣州囚罪一等徒以下釋之賜行營諸軍錢民

緣征沒者恤其家以交趾降赦廣南東路繫囚餘各降一等

徒以下釋之宋史神宗紀

熙甯中大食國使辛押陀羅乞統察蕃長司公事詔廣州裁

度又進錢銀助修廣州城不許宋史大食國傳

哲宗元祐三年妖人岑深謀襲番禺知廣州蔣之奇討平之

黃通志

元祐初蔣之奇知廣州妖人岑深善幻術聚黨二千人謀

取新興畧番禺之奇遣鈴轄楊從先致討生擒之宋史蔣之奇傳

徽宗政和四年十二月詔廣南市舶司歲貢真珠犀角象齒

宋史徽宗紀

高宗建炎五年廣州學教授林勳獻本政書黃通志

紹興元年五月廣賊鄧慶龔富作亂郭通志



謹案阮通志引此作黃通志誤

二年六月岳飛自虔州班師辛亥發兵屯駐虔廣二州彈壓

盜賊州各三千人宋史高宗紀

時虔吉盜連兵寇掠循梅廣惠英韶南雄南安建昌汀邵

武都諸郡帝命飛平之宋史岳飛傳

是歲海寇黎盛犯潮州宋史高宗紀

盛初犯廣州城縱火官軍莫敢前潮循惠均受其害上始

命統兵滅之黃通志

五年正月海賊朱聰犯廣州三月命廣東福建路招捕朱聰

宋史高宗紀

八月海賊朱聰降命補水軍統領宋史高宗紀

八年廣州西海壩有海獸如馬蹄鬣皆丹夜入民舍衆殺之

次日海溢環村百餘家皆溺死近馬禍也文獻通考

謹案宋史五行志載此事無州字疑是廣西地然廣

西與海不相近今廣州有地名西海近九江堡通考

乃南宋人書似較可據今從之

十六年廣州清遠縣韶州翁源縣英德府真陽縣鼠食稼千

萬爲羣時廣東久旱凡羽鱗皆化爲鼠自夏徂秋數月方息

歲爲饑文獻通考

二十七年十二月詔廣南經略市舶司審蕃商假託入貢宋史

高宗紀

二十九年二月禁海商假託風潮私往北界宋史高宗紀

孝宗乾道元年蠲廣東殘破郡縣稅賦宋史孝宗紀

廣東帥臣林安宅言近者湖南凶賊奔衝本路韶連南雄



封川德慶肇慶府之四會廣州之懷集清遠皆遭蹂踐或被焚蕩乞依廣西例免今年夏秋二稅並合應副轉運使供贍荆南及本路大兵錢糧詔併英賀郴州桂陽軍未起錢物悉蠲之文獻通考

淳熙十二年廣東饑令帥臣賑粟文獻通考

光宗紹熙元年六月以上供等錢償廣州放免身丁錢數宋史

光宗紀

二年三月增廣州摧鋒軍凡三百人宋史光宗紀

甯宗慶元三年夏廣東提舉茶鹽徐安國遣人捕私鹽於奚山島民遂作亂八月知廣州錢之望遣兵入大奚山盡殺島民宋史甯宗紀

東莞縣大奚山在縣南大海中有三十六嶼周三百餘里

居民不事農桑不隸征徭以魚鹽為生宋紹興間招降其人來祐等選其少壯者為水軍立寨水軍使臣一員彈壓官一員無供億寬魚鹽之禁謂之醜造鹽慶元三年鹽司峻禁遂聚為亂遣兵討徐紹夔等就禽遂據其地經畧錢之望與諸司請於朝歲季撥摧鋒水軍三百以戍季一更之慶元六年復請減戍卒之半屯於官富場後悉罷之今有姓萬者為會長因名老萬山倉格軍門志  
朝野雜記云大奚山在廣東島中慶元三年提舉徐安國捕鹽島民聚嘯為盜劫高登為首殺平民百三十餘人經畧雷濂與安國素有隙以生事聞於朝盡執島民戮之無噍類詔罷安國以錢之望知廣州象之嘗聞婺之士友鄭岳云岳曾館廣州時賊勢猖獗福昌有延祥寨水軍海寇



畏之錢帥請於朝乞差延祥將官商榮將兵以往而大奚山之人用木支格以釘海港官軍不知蹊徑竟不能入而島民盡用海舟載其兵弩達廣州城下州民散避會官船水手善跳船與賊首船遇乃從檣竿上飛過斫斷其帆索帆墮船不能進賊船遂亂商榮因用火箭射之賊大敗地與

勝紀

嘉定十四年廣州早詔賑之黃通志

理宗端平元年春正月廣州叛卒圍城以崔與之知本州討平之黃通志

端平初崔與之授廣東經畧安撫使兼知廣州先是廣州摧鋒軍遠戍建康留四年比撤戍歸未踰嶺就留戍江西又四年轉戰所向皆捷而上功幕府不報求撤戍又不報

遂率倡亂從惠陽郡長驅至廣州與之家居肩輿登城叛兵望之俯伏聽命曉以逆順禍福其徒皆釋甲而首謀數人懼事定獨受禍遂率之遁去入古端州以自固至是命與之即家治事屬提刑彭鉉討捕俄而新調諸軍畢集賊戰敗請降桀黠不悛者戮之其餘分隸諸州宋史崔與之傳

淳祐五年夏五月晦廣州大雨水黃通志

颶風大作夜潮不得退復駕晝潮沓之淫潦暴至瀕海室廬俱至四五尺溺二千餘家黃通志

冬十二月廣州大雪黃通志

臘初大雪三日積盈尺餘災方所未有也時經畧使方大琮躬出省視貧民與諸營疲卒均給緡錢以卹其寒闔郡大悅久之乃知其為瑞焉黃通志



寶祐元年夏六月廣州旱

黃通志

帝熈德祐二年正月升封吉王是為益王信王昺為廣王

宋史

瀛國公傳

元

世祖至元十三年

宋益王昺建炎元年

六月阿爾哈雅遣將克廣州御

批歷代通鑑輯覽

宋廣東經略使徐直諒遣其將梁雄飛請降於隆興阿爾哈雅假雄飛招討使使徇廣東既而直諒聞益王昺立乃復遣權通判李性道摧鋒軍將黃俊等拒雄飛於石門性道不戰俊戰敗奔廣州直諒棄城遁雄飛入廣州諸降將皆授以官俊獨不受被害

通鑑輯覽

徐直諒得驛報知元兵陷臨安江南湖南皆歸附乃遣梁

雄飛赴江西納款時湖南行省亦遣廣人曾仕倬與將校楊尹來諭直諒謂已通耗江西諭意水軍統領唐淵往迎於韶沉仕倬尹於江六月元將阿里海牙及呂師夔遣黃世傑與梁雄飛來徇廣州既直諒聞帝立於閩遂遣提刑郡李性道領摧鋒軍將黃俊陳寶水軍將謝賢拒世雄等於石門性道艤舟岸泚不戰俊迎敵敗績奔還直諒遂遁黃世傑等陷廣州授性道實賢淵官俊拒不受諸將殺之於摧鋒軍寨佛殿下

匡山志

九月東莞人熊飛為黃世傑守潮州聞趙潛至以兵應之攻雄飛於廣州雄飛遁遂復韶州新會令會逢龍帥鄉兵至廣州李性道出迎飛與逢龍執而殺之趙潛入廣州

宋史二王紀

飛等復廣州後十日制置使趙潛及轉運副使趙淇至數



日安撫使方興至索陳實謝賢斬之并戮性道唐淵遁去

匡山志

呂師夔張榮實入梅嶺趙潛遣曾逢龍熊飛禦於南雄逢龍戰死熊飛奔韶州守將劉自立以城降飛率兵巷戰兵敗赴

水死

宋史二王紀

十一月元兵通行都陳宜中張世傑備海舟於岸乙巳奉景

炎帝及廣王楊淑妃等登舟入海至惠州之甲子門駐焉宋史

二王紀

初是入泉州蒲壽庚提舉泉州舶司擅蕃舶利三十年來謁請駐蹕張世傑不可或勸世傑留壽庚凡海舶不令自隨不從縱之歸而舟不足乃掠其舟并沒其貨貨壽庚怒殺諸宗室及士大夫與淮兵之在泉者是移潮州宋史二王紀

廣南東路經略使劉應龍自福州導帝至廣州港口轉運

使姚良臣作行宮迎入州治元兵拒之退還大海駐秀山

山上有民萬餘家擇富室為殿居之師多病死惟陳宜中

得入廣州尋遁還

匡山志

十二月趙潛棄廣州制置方興亦遁

宋史二王紀

方興聞師夔將至委郡人趙若岡禦之興遁去若岡與忠

勇水軍陳勇開門降是夜勇齎榜招諭為營兵所殺師夔

以若岡知南恩州會方興在南恩不敢入

匡山志

帝次惠州遣使奉表請降於元

通鑑綱目

是次甲子門遣倪宙奉表詣軍前請降索多命其子元帥

伯嘉帑偕宙赴燕

通鑑綱覽

謹案阮通志云元史世祖紀倪宙作倪堅誤以為廣



王昺所遣

十四年景炎二年二月元兵略廣州廣東諸郡皆降帝舟次廣之

梅蔚南宋書

帝至廣州龍圖閣侍制張鎮孫家居與凌震集鄉兵圖復

廣州詔以鎮孫為廣東制置兼經畧安撫使元呂師夔梁

雄飛以軍餉不繼退走姚良臣迎帝入州治元兵守港者

拒之不果入元易正文陷梅州權僉判蔡蒙古死之厓山志

三月彗出東北長四尺餘厓山志

四月張鎮孫復廣州元梁雄飛出走帝舟次廣之官富場南宋書

鎮孫復廣州元梁雄飛出走韶州鎮孫遂入視事將校盧

震擁眾暴橫鎮孫叱縛之戮以示眾黃通志

六月帝舟次於古塔厓山志

八月元遣將塔出哈喇歹等趨廣州南宋書

元主詔塔出與李恒呂師夔等以步卒入大庾嶺蒙古岱

索多蒲壽庚及元帥劉深等以舟師下海追二王續通鑑

九月帝舟次廣之淺灣張世傑率師援廣州安撫使方輿出

禦塔出於石門戰敗南宋書

十月張鎮孫集戰船二千艘及塔出呂師夔大戰於海珠寺

敗績南宋書

鎮孫集戰艦二千於海珠寺與塔出力戰為元兵所破其

管軍總管王守信奪艦百八十斬首不可勝計黃通志

十一月達春會兵克廣州通鑑輯覽

初達春令索多取道泉州泛海會於廣之官富場索多既



取興化及漳州進攻潮州守臣馬發竭力拒守索多恐失期舍之去至惠州與呂師夔合軍趨廣州張鎮孫以城降

達春遂夷廣州城

通鑑輯覽

鎮孫既降丞相陳宜中少傅張世傑蘇劉義等奉帝幸香山以馬南寶宅為行宮復駐淺灣

蘇天爵元文類

劉深攻帝於淺灣張世傑戰敗乃奉帝退保秀山陳宜中入

占城遂不返

南宋書

劉深將兵襲淺灣張世傑奉益王昶走秀山遂至井澳颶風壞舟溺水幾不救昶得驚疾旬餘諸兵士稍集死者過半劉深襲井澳昶奔謝女峽復入海至七星洋欲往占城陳宜中請先往諭意遂不返

通鑑輯覽

哈喇歹及宣撫梁雄飛招討王天祿等敗世傑於香山島

奪其戰艦符印俘獲官吏盧茂等丞相陳宜中眾尚數千人舟八百艘走至虎頭山中流大風壞舟眾多溺死宜中

僅以身免

通鑑輯覽

十一月元將劉深追帝至七星洋執衛王提舉官俞如珪

南宋書

謹案七星洋二王紀作七州洋續通鑑作七星洋方輿紀要作九星洋與此特異按文昌東海有七州洋然劉深追宋師必無舍廣州而直抵瓊州之理惟方輿紀要引一統志云九星洋在香山縣南又云海中

有九曜山羅列如九星洋因以名然則亦廣州地也諸書所載殆因字形相近而誤耳

十五年

景炎三年五月以後衛王昶祥興元年

帝在謝女峽

厓山志



二月帝舟還廣州尋次於碭州

黃通志

謹案文丞相年譜附傳引鄧傳云五月公始聞端宗皇帝晏駕於化州之碭州升碭州為翔龍縣附注不知何人其云鄧傳蓋鄧光薦文丞相傳也考太平寰宇記云化州東南至碭州鎮大海二百二十里則碭州實在化州境中然是時景炎奔播或在井澳或在謝女峽或在古塔或在梅蔚或在官富場總不出香山東莞之間無緣忽至化州也况元史世祖紀廣西道宣慰司遣總管崔永等招降雷化高等三州即以永等鎮守之則此時化州既為元所得曷之不能直抵化州又明甚按吳萊南海人物古蹟記大奚山在東莞南一曰碭州陳仲微二王本末云碭州屬廣之

東莞縣與州治相對第隔一水吳淵頴元人其游粵時去宋亡未遠而陳仲微從二王海上目擊時事其紀載尤為有徵也明錢士升南宋書亦云帝欲往占城不果遂駐化之碭州殆俱沿鄧光薦傳之誤

香山義士馬南寶獻粟千石餉軍

崖山志

三月廣州都統凌震轉運判官王道夫取廣州

宋史二王紀

謹案元史世祖紀云四月廣州張鎮孫叛犯廣州守將張雄飛棄城走出兵臨之鎮孫乞降命遣鎮孫及其妻赴京師云云按鎮孫復廣州在至元十四年無緣十五年復有犯廣州事也史殆綜述其前後事言之耳張鎮孫行至大庾嶺自經死見張鎮孫傳

四月戊辰帝崩於碭州庚午衛王昺即位於碭州

宋史二王本末



景炎皇帝遺詔曰朕以幼沖之資當艱厄之會方太皇命之南服黽勉於行及三宮胥而北遷憂悲欲死卧薪之憤飯麥不忘奈何乎人猶託於我涉甌而肇霸府次閩而擬行都吾無樂乎爲君天未釋於有宋強膺推戴深抱思慙而夷虜無厭氛祲甚惡海桴浮避澳岸栖存雖國步之如斯意時機之有待乃季冬之月忽大霧以風舟楫爲之一摧神明拔於旣溺事而至此夫復何言矧驚魄之未安奄北哨其已及賴師之武荷天之靈運濟於危以相所往沙洲何所垂閱十旬氣候不齊積成今疾念衆心之鞏固忍萬古以違離藥非不良數不可追惟此一髮千鈞之託幸哉連枝同氣之依衛王昺聰明夙成仁孝天賦相從險阻久繫本根可於柩前卽皇帝位傳璽綬喪制以日易月內

庭不用過哀梓宮無得輒置金玉一切務從簡約安便州郡權暫奉陵寢嗚呼窮山極川古今未嘗之患難涼德薄祚我乃有負於臣民尙竭至忠共扶新運故茲詔示想宜知悉祥興皇帝登寶位詔曰朕勉承丕緒祇若令猷皇天付中國民旣勤用德聖人居大寶位曰守以仁藐茲眇沖適際危急惟我朝之神聖繼統而家法以忠厚傳心滲漉在人億萬年其未泯遭逢多事百六數之相乘先皇帝聰明出於羣倫孝友根乎至性痛憤三宮之北未嘗一日而忘遺大投艱不應後志除兇刷恥惟懷永圖託於神明辱在草莽上霧下潦之所偃薄洪濤巨浪之所震驚謂多難以殷憂宜祈天而永命胡甯予忍而不其延日月爲之無光社稷凜乎如髮攀髯何及繼志其誰以趙孤猶幸僅存



盍使為宗祧之主以漢賊不容兩立庶將復君父之仇大義攸關輿情交迫閔予小子遭家不造而況斯今於前甯人圖功攸終其難莫甚尚賴元勳宿將義士忠臣合心而併謀協志而畢力敵王所愾悍我於艱茲用大布寬恩率循彝典於以導迎和氣於以迓續洪庥可大赦天下於戲人心有感則必通世運無往而不復成誦雖幼有周甯後於四征少康之興祀夏實基於一旅往求攸濟咸與維新端宗崩羣臣多散去陸秀夫曰度宗皇帝一子尚在將焉置之古人有以一成之旅中興者今百官有司皆具士卒數十萬天若未絕宋是不可為國耶眾共立帝時年八歲告祭天地宗廟遣張世傑趙潛曾淵子陸秀夫蘇劉義劉鼎孫等行禮諡景炎帝孝恭仁裕懿聖濟文英武勤政皇

帝廟號端宗

厓山志

謹案阮通志云宋史端宗諡裕文昭武愍孝皇帝與厓山志不同然黃滔所記必出於宋遺民野航諸書較宋史為可信也祥興改元據舊志引番禺志在明年正月二說不同未知孰是

是月黃龍見海中

宋史二王紀

五月朔帝即位於硃州太后楊氏同聽政改元祥興尋升廣州為翔龍府

厓山志

方登壇禮畢御輦所向有龍擎空而上既入宮雲陰不見時世傑秉政而秀夫裨助之外籌軍旅內調工役凡有述作盡出其手雖匆遽流離中猶日書大學章句以勸講

綱目續編



時礪州糧少乃遣人徵糧於瓊州海道灘水淺急艱於轉運取道沓磊浦以進元雷州總管蒙古特以兵邀擊之續通鑑

謹案沓磊浦續通鑑作沓磊非是沓磊今在徐聞縣境中亦見經世大典

六月朔日食僅存分杪相對幾不辨色厓山志

乙亥帝舟次於厓山黃通志

時宋軍所泊居雷化犬牙處而厓山在鉅海中與奇石山相對如兩扉潮汐之所出入也故有鎮戍張世傑以為天險可扼以自固乃奉其主昺移駐遣人入山伐木造行宮軍屋數十餘間行宮正殿曰慈元楊太后居之時官民兵尚二十餘萬多居於舟資糧取辦於廣右諸郡海外四州

復刷人匠造舟楫器仗至十月始罷通鑑輯覽

己已有大星東南流墜海中小星千餘隨之聲如雷宋史二王紀

元發蒙古軍千人從江東宣慰使張宏範由海道追宋餘眾元史世祖紀

詔以張宏範為都元帥李恒副之將兵入閩廣宏範言張世傑復主衛王閩廣響應宜進取之帝以宏範為蒙古漢軍都元帥賜寶劍專決軍事宏範薦李恒自副從之宏範至揚州選將校發水陸之師二萬分道而南復命達春留後供軍費通鑑輯覽

加文天祥少保信國公張世傑越國公宋史二王紀

時端宗崩少帝立行朝在厓山天祥乃移軍船澳在歸善縣南上表自劾兵敗江西之罪因乞入衛優詔不許加少保信



國公天祥移書陸秀夫曰天子幼冲宰相遁荒詔令皆出諸公之口豈得以游詞拒乎詔起復之惠州府志

九月葬端宗以觀文殿大學士曾淵子充山陵使陵曰福陵

匡山志

謹案匡山志云帝崩於礪州至香山殯馬南寶家後葬壽星塘山中有陵迹五處莫知真陵所在填海錄云葬於匡山二說互殊未知孰是

十月元昶行省造海船付烏馬兒張宏範增兵四千俾將之

元史世祖紀

元蒙古漢軍數路並進張宏範以舟師由海道襲漳潮惠三州李恆以步騎由梅嶺襲廣州南宋書

閏十一月王道夫凌震棄廣州遁大軍入廣州宋史二王紀

李恆兵至清遠王道夫迎戰大敗恆遂擊凌震海上將吏

宋邁等二百人力戰皆被執奪三百艘庚戌道夫棄廣州

遁壬戌震遁癸亥恆入廣州南宋書

十二月王道夫攻廣州兵敗被執凌震兵繼至亦敗震兵又

敗於芟當作芟塘宋史二王紀

凌震敗於芟塘脫走往匡山與翟國秀軍合匡山志

謹案芟塘宋史作芟塘南宋書又作芝塘均誤

十六年宋帝昺祥興二年二月張宏範及宋張世傑戰於匡山世傑

兵潰陸秀夫負其主衛王昺死之世傑復收兵至海陵山舟

覆而死通鑑輯覽

正月庚戌張宏範發潮陽港壬戌至匡山圍世傑軍甲子

李恆聞宏範已赴海道即率糜船百二十艘入海庚午會



於厓山初宏範至甲子門獲宋斥候劉青顧凱知帝棲於厓山之西山南北亘二百餘里東南枕海西北皆港宏範至山北水淺不通乃由山東面南又西與帝遇帝建宮山麓葦結臣艦千餘艘下碇海中艫而外舳大索貫之爲柵以自固四圍樓櫓如城宏範潛舟載騎兵登麓焚其宮帝以鬪艦號快船者樵汲宏範命樂總管山寨斷其汲路恒以拔都船當之帝遣兵爭之皆敗去自是樵汲日梗宏範又命樂總管自寨以礮擊帝艦艦堅不動有烏蜚船千艘救帝艫於北宏範笑曰此徒取死耳夜擇小舟由港西潛列烏蜚船北徹其兩岸且以戰艦衝之烏蜚船皆屬海民素不知戰帝又不敢援進退無據攻殺靡遺宏範因取烏蜚船載草灌油乘風縱火欲焚帝艦帝預以泥塗艦懸水

筒無數火船至鉤而沃之竟莫能燬宋將周文英曰挑戰十餘次皆爲宏範所敗宏範以張世傑其父柔之故卒戊杞時有罪逃宋索其甥韓某署萬戶府經歷三遣諭禍福世傑歷數古忠臣曰吾知降生且富貴第爲主死不移也韓迫之世傑笑曰果欲我降徹汝圍兵使吾出諸將請以礮攻之宏範曰礮攻敵必浮海散去吾分追非所利不如以計聚留而與戰也且上戒吾屬必誅滅此今使之遁何以復命恆亦謂宏範曰我軍雖圍宋宋船正當海港日逐潮水上下宜急攻之不然彼薪水旣絕自知力屈恐乘風潮之勢遁去徒費軍力不能成功也遂畫圖定議與敵船相值對攻二月壬午夜宏範召諸將三誓之發碇與帝相對癸未平旦宏範分諸將爲四軍恆當帝北及西北角樓



諸將分居帝南及西宏範將其一居西南去帝里許令曰敵東附山潮退必南遁南軍急攻勿失之西北軍期吾樂作乃戰又令曰敵西南艦可受危聞其將左大守之必驍勇也吾其自攻諸將謂元帥不宜自輕某等當効力宏範曰帥當先其難者頃之有黑氣出山西微雨滿天宏範曰吉兆也潮退水南瀉恆從北面順流衝擊突入其陣恆令諸軍船尾命柁師轉船逆行徑擣其柵我軍憑高瞰敵勇氣百倍登其船斷其索短兵接戰彼以江淮勁卒各殊死鬪矢石蔽空至巳時奪三船恆率拔都軍復與快船戰至日午潮水長北流南面軍復順水勢進攻世傑腹背受敵以火礮禦南面軍預濡罽覆艦礮盡不能均寸尺然戰不利宏範益其卒始奪一艦宏範所乘艦布障四匝伏盾作

樂敵疑宴而懈宏範以已艦卑於敵且出入艱乃回艦尾抵左大左大射矢集布障桅索如蝟宏範度其矢盡撤障去盾兵矢火石俱發奪左大艦又與夏御史戰奪七艘敵懾衄去自投水諸將合勢乘亂皆殊死戰自己至申聲震天海斬獲幾盡宋端明殿學士陸秀夫先沈妻子於水登帝船曰官家事危矣奈何遂抱帝俱死於水時宏範操小舟詣恆議事世傑等乘間開南壁率十六艦奪港門遁去恆與宏範等追至厓山口值天晚風雨驟至煙霧四塞諸將各相失宏範還恆獨進追之承宣使翟國秀等解甲就降焚溺之餘尙得海艦八百餘艘甲申浮水之屍十餘萬有卒求物屍間言見一屍小而晷衣黃衣負印籤云詔書之寶取寶獻宏範宏範問宋人尹都統曰帝也又問近侍



數人皆以為然求之已不得矣恒追至高州得帝屍經世大典

世傑乘霧雨昏暝擁帝及楊太妃脫去陸秀夫抱帝赴海

死時御舟一白鷗奮擊哀鳴與籠俱墜水中內翰劉鼎孫

等溺者數萬厓山志

楊太后聞帝死撫膺大慟曰我忍死間關至此者正為趙

氏一塊肉耳今無望矣遂赴海宋史二王紀

世傑將之安南五月四日舟抵南恩之平章港口颶風大

作舟人欲艤舟世傑曰無以為也為我取瓣香來至則仰

天祝曰吾為趙氏亦已至矣一君亡復立一君今又亡矣

我未死者庶幾彼退別求趙氏立之以存宗祀耳今若此

天意果何如耶若天不欲吾復趙氏則大風覆吾舟舟遂

覆世傑溺焉諸將求得屍焚之葬陽江縣潮居里赤坎村

厓山志

張世傑范陽人少從張柔成杞有罪奔宋隸淮兵中阮思

聰見而奇之言之呂文德召為小校累功至黃州武定諸

軍都統制攻東安有功轉十官咸淳四年命世傑將五千

人守鄂州丞相伯顏攻鄂降世傑提部兵入衛道復饒

州乃入朝時方危急徵諸將勤王多不至獨世傑來上下

歎異自和州防禦使不數月累加至保康軍承宣使總都

督府兵十月進沿江招討使已而大軍至獨松關召入衛

加檢校少保二年正月大軍迫臨安請移三宮入海而與

文天祥合兵背城一戰丞相宜中方遣人請和白太后止

之未幾和議亦沮兵至臯城世傑乃提兵入定海四月從

二王入福州五月與宜中奉昱為王拜僉書樞密院事王



世強導大軍攻之乃奉益王入海至淺灣移徙碭州至元十四年益王昺立拜少傅樞密副使徙王新會之厓山八月封越國公明年張宏範等兵至或謂世傑曰北兵以舟師塞海口則我不能進退盍先據海口幸而勝國之福也不勝猶可西走世傑恐久在海上衆有離心動則必散乃曰頻年航海何時已乎今須與決勝負悉焚行朝草市結大舶千餘作水砦爲死守計宏範至據海口樵汲道絕茹乾糧十餘日渴甚下掬海水飲之海鹹飲卽嘔泄兵大困世傑率蘇劉義方興曰大戰宏範得世傑甥韓命以官使三至招之世傑歷數古忠臣曰吾知降生且富貴但爲主死不移耳二月宏範舟薄中流世傑奪港去復還收兵厓山劉自立擊敗之降其將方遇龍葉秀榮章文秀等四

十餘人世傑欲奉楊太妃求趙氏後而立之俄颶風壞舟

溺死平章山下劉師勇廬州人以戰功歷環衛官從二王

至海上見時事不可爲憂憤縱酒卒葬於鼓山

宋史張世傑傳

陸秀夫字君實鹽城人生三歲其父徙家鎮江景定元年登進士第李庭芝鎮淮南辟至幕中庭芝器之雖改官不使去就幕三遷至主管機宜文字咸淳十年庭芝制置淮東擢參議官德祐元年除司農寺丞二年正月以禮部侍郎使軍前請和不就而反二王走温州秀夫追從之與陳宜中張世傑立益王於福州進端明殿學士僉書樞密院事宜中以秀夫久在兵間知軍務每事咨訪始行旋與宜中議不合宜中使言者劾罷之張世傑讓宜中曰此何如時動以臺諫論人宜中惶恐亟召秀夫還時播越海濱庶



事疏畧楊太妃垂簾與羣臣語猶自稱奴每朝會秀夫儼然正笏立如治朝或時在行中淒然泣下以朝衣拭淚左右無不悲慟者王以驚疾殂與衆共立衛王時陳宜中往占城與世傑不協屢不至乃以秀夫爲左丞相駐兵厓山秀夫外籌軍旅內調工役凡有述作盡出其手雖流離中猶日書大學章句以勸講至元十六年二月厓山破秀夫走衛王舟度不可脫仗劍驅妻子入海哭拜幼君曰陛下不可再辱起抱幼君以匹練束如一體用黃金墜砸腰間赴水死年四十四翰林學士劉鼎孫亦驅家屬并輜重沉海不死被執榜掠無完膚一夕得脫卒蹈海鼎孫字伯鎮江陵進士也秀夫在海上記二王事爲一書以授禮部侍郎鄧光薦曰君後死幸傳之其後厓山平光薦以其書還

廬陵大德初光薦卒其書存亡無從知故海上之事莫得

其詳云

宋史陸秀夫傳

文天祥字宋瑞又字履善吉水人年二十舉進士對策集英殿時理宗在位久政治寢怠天祥以法天不息爲對其言萬餘不爲藁一揮而成帝親拔爲第一考官王應麟曰是卷古誼若龜鑑忠肝如鐵石臣敢爲得人賀開慶初元兵伐宋宦官董宋臣說上遷都人莫敢議天祥時爲甯海軍節度判官上書乞斬宋臣不報卽自免歸後稍遷至刑部郎官出守瑞州改江西提刑累爲臺臣論罷除軍器監兼權直學士院賈似道稱病乞致仕以要君有詔不允天祥當制誥皆諷似道似道不樂使張志立劾罷之咸淳九年改爲湖南提刑十年改知贛州德祐初江上報急詔天



下勤王天祥捧詔泣涕使陳繼周發郡中豪傑并結溪崗使方興召吉州兵有衆萬人事聞以江西提刑安撫使召入衛八月提兵至臨安除知平江府元兵入獨松關陳宜中留夢炎召天祥守餘杭未幾宜中世傑皆去除天祥樞密使尋除右丞相如軍中論和與伯顏抗論伯顏拘之北至鎮江與其客杜濟十二人夜亡入真州從高郵汎海至温州聞益王未立上表勸進以觀文殿學士召至福拜右丞相尋與宜中議不合乃以同都督出江西至元十四年四月入梅州都統王福錢英跋扈斬以徇五月出江西六月入興國縣江西宣慰使將兵攻天祥大敗收殘兵奔循州十五年進屯麗江浦六月入船澳衛王立加天祥少保信國公軍中疫起兵士死者數百人天祥惟一子與其母

皆死十一月至潮陽縣潮州盜陳懿劉興數叛天祥攻走懿執興誅之十二月趨南嶺鄒鳳劉子俊自江西起兵來再攻懿懿潛遁張宏範兵至天祥方飯五坡嶺兵突至不及戰天祥倉皇出走千戶王惟義執之吞腦子不死官屬士卒得脫空坑者至是劉子俊陳龍復蕭明哲蕭資皆死惟趙孟榮遁張唐熊桂吳希夷陳子全兵敗俱死焉張唐張栻後也天祥至潮陽見宏範不拜遂以客禮見與之俱入厓山使爲書招張世傑天祥曰吾不能扞父母乃教人叛父母可乎索之固乃書所過零丁洋詩與之其末句云人生自古誰無死留取丹心照汗青持詩以達張稱好人好詩竟不能逼厓山破軍中置酒大會宏範曰國亡丞相忠孝盡矣能改心以事宋者事皇上將不失爲宰相也天



祥泣然出涕曰國亡不能拔死有餘罪况敢逃死二心乎

宏範義之遣送京師在道不食八日不死至燕館供張甚

盛天祥不寢處坐達旦遂移兵馬司設卒以守之十九年

十二月殺於都城之柴市贈廬陵郡公諡忠武文天祥傳通鑑輯要

陳仲微字致廣高安人嘉泰二年進士調莆田尉德祐元

年拜右正言左司諫殿中侍御史益王即位海上拜吏部

尚書給事中厓山敗走安南越四年卒其子文孫與安南

王族人益稷出降導我師南征安南王憤伐仲微墓斧其

棺宋史陳仲微傳

杜滸字貴卿丞相範從子也少負氣俠德祐元年有詔勤

王滸時宰縣糾集民兵四千人文天祥開閩平江往附焉

天祥北行諸客無從者滸慨然請行特改兵部架閣從京

口以計脫天祥偕走海道以達永嘉益王即位授司農卿

廣東提舉招討副使督府參謀尋往温台招集兵財福安

陷與天祥相失遂趨行朝蘇劉義疑滸自來欲殺之陳宜

中張世傑不可使人監護之乃免久之奉命復入天祥幕

空坑兵敗又跋涉患難以出天祥移屯潮州滸議趨海道

天祥不聽使護海舟至官富場滸懼力單徑趨厓山兵潰

被執以憂憤病卒宋史忠義傳

茅湘京口人爲兵部侍郎厓山敗併妻子隨帝赴海死厓山志

趙樵吏部侍郎赴海死厓山志

高桂汴梁人爲樞密使赴海死厓山志

朱張恂字忠厚錢塘人爲進義校尉臨安陷隨帝至厓山



督舟師力戰與陸秀夫同日赴海死匡山志

徐宗仁永豐人淳祐十年進士歷太常少卿為御史郭聞

論罷德祐元年起為禮部尚書兼益王府贊論從端宗海

上兵敗赴海死匡山志

蘇劉義荆湖人景定初從呂文德鄂州戰有功轉十官雖

出呂氏乃心王室永嘉推戴實建大功世傑用事志鬱鬱

不得展其人剛躁不可近然能服義終始不失大節景炎

新造拜檢校少保殿前指揮司司馬兼諸路經制鎮撫大

使廣東西策大使丁丑七月罷諸使帝在井澳元劉深來

襲陳宜中如占城劉義不以為是追之不及而返夜泊灣

頭俄天火飛集其舟延燒甚眾祥興進開府儀同三司殿

前都指揮使匡山敗與世傑斷港奔海洋為麾下所殺匡山志

志指南錄

鍾震桂與茶陵賀尹二姓稟命同文督府門行至匡山未

幾兵潰被擄後脫去匡山志

鄧光薦字中甫文公同郡人北兵度嶺及廣陷避地深山

適強寇至妻子等匿暗室寇無所睹焚其居十二口同時

死中甫至匡山除禮部侍郎已卯除學士院權直匡山潰

中甫赴海元人救出之宏範待以客禮命其子珪受學光

薦嘗遺一編目曰相業語珪曰熟讀此後必賴其用匡山志

元史張珪傳

賈純孝登進士仕至朝散郎匡山師敗抱二女偕妻牟氏

同蹈海死匡山志

張烈良德祐初為湖南制置使端宗時與提刑劉應龍起



兵應厓山為阿里海涯所敗奔思州烏羅洞元人襲之俱

戰死厓山志

劉鼎孫字伯鎮江陵人第進士為翰林學士從幸厓山陸

秀夫既抱帝赴海鼎孫亦驅家屬并輜重沈海被執榜掠

無完膚一夕脫卒蹈海死厓山志

張達及其妻陳璧娘景炎元年帝舟次潮州駐蹕紅螺山

明年正月遷惠州甲子門都統張達率義勇扈蹕妻陳璧

娘送至南澳海中洲上勉達勤王後達弟格值赴厓門璧

娘賦平元曲寄達達死難璧娘得達屍葬之曰吾夫能死

忠吾不能死節乎遂閉門不食死厓山志

南海婦陳氏東莞烏沙人嬪於李祥興帝次厓山陳氏屬

其子佳且訣曰往事宋勿以我故懷二心遂趨黃木灣赴

水聞者悲之厓山志

謹案阮通志於厓山死節諸臣咸附錄於宋亡後今

謹仍之其有忠臣烈女而阮志未採者亦具錄如右

李恆以其子世安監廣州設廣州路州縣達魯花赤黃通志

謹案黃志引草木子云達魯花赤華言荷包上襟子

也

十七年詔廣州採珠黃通志

十八年十一月孟慶元孫勝夫並為廣州宣慰使並領出征

調度元史世祖紀

謹案阮通志云是時索多征討占城諸國故有調度

事也

南海民李梓兵起稱宋年號遣萬戶王守信佩虎符戍廣州



自南安發兵取葛岍洞崖石砦殲李梓黃通志

十九年二月立廣東按察司元史世祖紀

謹案黃通志載此事在二十年與元史異

夏六月海水溢傷稼香山志

二十年正月改廣東提刑按察司為海北廣東道元史世祖紀

三月廣州新會縣林桂芳趙良鈐聚眾偽號羅平國稱延康

年號官軍擒之伏誅餘黨悉平元史世祖紀

廣州新會縣林桂芳兄弟與趙良鈐等聚眾萬餘稱羅平

國改元延康王守信討之桂芳請降已而復帥南海軍三

千人夜攻守信守信擊敗桂芳斬之生致其帥潘舍人以

獻餘黨悉平時征日本又伐占城日拘水手造海船民不

聊生故廣東兵無甯歲黃通志

鹽戶陳良臣等兵起都轉鹽運使合刺普華討平之黃通志

江南宣慰使合刺普華未至官改廣東都轉運鹽使兼領

諸蕃市舶時盜梗鹽法陳良臣煽東莞香山負販之徒為

亂江西行省令與招討使荅失蠻討捕斬之招誘餘黨復

業元史

南海民歐南喜新會民黎德等兵起遣張玉討之黃通志

南海民歐南喜自稱宋將軍與新會民黎德聚眾十萬殺

居民陷城邑增城縣蔡大老鍾大老唐大老皆應之據平

康下里東團村等處改元各稱王署置丞相招討等官嶺

海騷動詔遣張玉將兵萬人會江西行省討之官軍與戰

屢為所敗元文類

歐南喜僭王號偽署丞相招討眾號十萬合刺普華圖上



其山川形勢及攻取之策三十餘條遂與都元帥課兒伯海牙宣慰都元帥白佐萬戶王守信等分兵搃之未幾右丞索多征占城交趾屬合刺普華護餉道北至東莞博羅二界中遇劇賊區鐘等橫絕石灣其鋒銳甚普華身先士卒且戰且行矢竭馬創徒步鬪殺數十人以眾寡不敵為所執遂遇害元史合刺普華傳

南喜自王於清遠遣其將馬帥陸帥徐相襲廣州王守信出兵擊三人斬之馘其軍千人平十數壁南喜乃走如新會合黎德黃通志

時蔡大老等據平康下里東團村等處江西行省兵擊破之梁起莘附於王守信遁歸馮村眾憤甚於是黎德集船七千艘眾號二十萬其將吳林以八百艘圍馮村先是守

信抽工於軍伐材於山造戰艦三百五十以烏船五十載之北與林戰出所載船直衝之林眾大潰沉海死黃通志

二十一年十一月江西行省參知政事雲丹密實擒獲海盜黎德及招降餘黨百三十三人即其地誅黎德以徇以德弟浩及偽招討吳興等檻送京師元史世祖紀

南喜走藍漢營官軍追燒之或誘致一男子曰此歐王也并所署都督丞相兵馬鈐轄二十四人即其地磔之然南喜實踰嶺久之乃死黃通志

謹案舊志黎德本新會人元史以為江西盜蓋當時廣惠韶潮南雄德慶肇慶諸路皆隸於江西行省其後鍾明亮或稱廣東賊或稱江西盜亦此例也

二十二年三月詔追捕宋廣王及陳宜中元史世祖紀



謹案元文類云李恆追世傑至高州獲曷尸還既云獲曷尸矣何以是年復有追捕之詔耶意當時必有言衛王實在占城者故有是命

東莞民張彊等兵起王守信擊敗之黃通志

彊聚眾二萬餘以復宋為名王守信還自京師出奇兵擊敗其三千餘人首功三百歸所掠人畜於其主宣慰使白佐入覲惟恐守信受代預請乞尙書宜留於是再授懷遠

大將軍餘官如故黃通志

二十三年十一月改廣東轉運市舶提舉司為鹽課市舶提

舉司元史世祖紀

二十五年六月詔加封南海明著天妃為廣祐明著天妃元史世祖紀

禁廣州官民毋得運米至占城諸蕃出糶黃通志

二十六年春遣使祀南海元史世祖紀

徙廣州按察司於韶州元史世祖紀

劉國傑東入肇慶攻閩大獠於清遠元史劉國傑傳

廣東陳大老兵寇道州劉國傑討擒之黃通志

後廣東盜再起國傑復出道州繼又經畫凡廣東江西盜所出人之地南北三千里置戍三十有八分屯將士以守之元史劉國傑傳

二十七年六月廣州增城韶州樂昌以遭畬賊之亂並免其

田租元史世祖紀

八月廣州清遠大水免其租元史世祖紀

二十八年二月遣官詣南海致禱元史世祖紀



八月罷廣州人匠元史世祖紀

三十年四月廣東置市舶司廣東肅政廉訪司復治廣州元史

世祖紀

成宗大德四年八月置廣東鹽課提舉司元史成宗紀

八年詔焦養直代祀南海元史焦養直傳

仁宗皇慶元年正月旌表廣州路番禺縣孝子陳韶孫仁宗紀

延祐四年十二月復廣州採金珠子都提舉司秩正四品官

三員元史仁宗紀

七年五月遣使權廣東番貨元史仁宗紀

六月罷廣東採珠提舉司黃通志

八年飢香山志

英宗至治二年三月復置市舶提舉司於廣東元史英宗紀

秋九月地震香山志

三年十二月廣州路新會縣民汜長弟作亂廣東副元帥烏

馬兒率兵捕之元史泰定帝紀

謹案黃通志載此事於至治二年當誤今從元史

泰定帝泰定元年七月罷廣州採珠蠶戶為民仍免差稅一

年元史泰定帝紀

泰定元年六月車駕在上都先是帝以災異詔百官集議

曰歲貢方物有常制廣州東莞縣大步海及惠州珠池始

自大德元年奸民劉進程連言利分蠶戶七百餘家官給

之糧三年一採僅獲小珠五兩六兩入水為蟲魚傷死者

眾遂罷珠戶為民其後同知廣州路事塔察兒等又獻利

於失列門創設提舉司兼采廉訪司言其擾民復罷歸有



司既而內正少卿魏暗都刺冒啓中旨馳驛督探耗廩食  
疲民驛非舊制請悉罷遣歸元史張珪傳

順帝至元三年正月廣州增城縣民朱光卿反其黨石昆山  
鍾大明率衆從之僞稱大金國改元赤符命指揮狗札里江  
西行省左丞沙的討之元史順帝紀

二月中書察知政事納麟等請立採珠提舉司元史順帝紀  
先是嘗立提舉司泰定間以其煩擾罷去至是納麟請復  
立之且以採珠戶四萬賜伯顏元史順帝紀

五月詔汝甯棒州廣東朱光卿聶秀卿等皆係漢人漢人有  
官於省臺院及翰林集賢者可講求誅捕之法以聞元史順帝紀  
七月狗札里沙的擒朱光卿尋追擒石昆山鍾大明元史順帝紀  
六年二月罷廣東採珠提舉元史順帝紀

至正六年六月廣州增城縣羅浮山崩水涌溢溺者百餘人

元史五行志

十二年有星如月隕於廣州黃通志

十三年廣東宣慰使世傑班殿謀害廉訪使百家奴僉事八  
撒刺不花執世傑班殿殺之黃通志

八撒刺不花誅戮黨與城內民皆皇皇不安黃通志

南海民邵宗愚盧實善兵起自稱元帥黃通志

宗愚三山人實善龍潭人各據鄉土黃通志

十五年東莞民王成陳仲玉兵起黃通志

成與仲玉號稱二長角力爭據時何真爲河源務副使見  
時俶擾遂棄官歸十九年乃請於行省舉義兵除之是年  
韓林兒稱徽宗之後國號大宋中原豪傑莫不響應南海志



十八年秋大水香山志

二十一年二月江南行臺侍御史八撒刺不花殺廣東廉訪使完者篤副使李思誠僉事迭麥赤以兵自衛據廣州順帝紀

時八撒刺不花以廉訪使久居廣東專恣自用詔乃以完者篤為廉訪司官而除八撒刺不花侍御史八撒刺不花不受命怒完者篤等代已即誣以罪盡殺之惟廉訪使董

鑰哀請得免元史順帝紀

廣州增城香山兵起黃通志

增城縣人王可成曹叔安等自稱元帥攻據縣治何真遣弟迪平之遂撫其縣香山縣人李祖二聚眾攻掠縣治宣差朶羅歹不能禦邑人鄭榮叟等徙治於邑之古寨山奉朶羅歹同守未幾朶羅歹死於寨繼而南海龍潭寇盧二

寶善率眾屢至攻寨弗克新會土寇黃斌攻掠縣治居民流散黃通志

二十二年春廣西賊秦得用據清遠縣黃通志

清遠縣為海寇劫掠主簿白太守始築土城以防拒之廣

西秦得用稱秦政攻據縣治清遠志

十月江西行省平章朶列不花移檄討八撒刺不花時朶列

不花分省廣州適邵宗愚陷廣州執八撒刺不花殺之順帝紀

邵宗愚率兵陷廣城殺僉事八撒刺不花餘皆棄城走宗

愚據城縱火殺掠居民喪亡甚眾東莞何真集義兵保障

人多歸之惠州王仲剛與叛將黃常稱元帥據惠貪暴肆

斂民不堪命眾募真有撫綏保障之義迎以守惠由是解

惠州之困逐黃常戮仲剛循惠二州民賴撫安元行省使



者授真分省左丞真聞宗愚據廣乃率眾攻復廣州宗愚走還三山真入省嚴號令禁毋擅屠掠廣賴以安黃通志

二十五年七月廣州彗星見黃通志

九月邵宗愚圍廣州十月陷之黃通志

宗愚挾廉訪司副使廣甯等復來圍廣州真撫眾拒戰賊乃退時城中糧盡民食蕉頭麻根至煮皮籠靴鞋禦饑終無異志是歲十月真部屬馬丑寒與宗愚通竊起據博羅構逆隔絕糧道檄報真亟赴惠州帥部伍平之愚闕真離廣州復率眾陷城殺掠尤甚南海志

元使太常卿余觀國航海招諭諸起兵者黃通志

嶺道為盜賊所梗觀國乃航海至新會惟北到甲林文秀尚能固守觀國命其鄉曰崇節以褒之新會志

二十七年四月何真復廣州宗愚走三山黃通志

真還廣州民皆應之宗愚懼復走三山未幾江西行省右丞鐵里迷失來按廣未入城宗愚遣人迎歸三山誣真潛據欲攻之無何鐵里迷失死於賊真以功進右丞黃通志

六月彗星見於南方黃通志

二十八年四月明兵取廣州路元史順帝紀



南海譚宗浚分纂 南海梁 起初校 順德盧乃潼再校  
番禺史悠履三校 順德羅 槃四校

廣州府志卷七十七終

廣州府志七十八

前事略四

明

明太祖洪武元年二月湯和提督海運廖永忠為征南將軍

朱亮祖副之由海道取廣東

明史太祖紀

敕贛州衛指揮陸仲亨帥師會廖永忠等征廣東帝諭仲

亨等曰近命平章廖永忠等由福建取廣東今特命爾等

率師由韶州直擣德慶當撫輯生民毋縱殺掠

明典彙

四月廖永忠師至廣州元守臣何真降廣東平

太祖紀

永忠先發書諭元左丞何真曉譬利害真即奉表請降至

東莞真率官屬出迎至廣州降盧左丞擒海寇邵宗愚數

其殘暴斬之廣人大悅

廖永忠傳



陸仲亨率師掠英德清遠連州肇慶等處進攻德慶元守將張鵬棄城走明典

仲亨遂引兵會廣州永忠師至廣州之龍潭元將盧左丞遣鎮撫盧成納欵得海舟五百餘艘軍士一千九百餘人馬三百匹糧五千餘石命指揮胡通守之永忠師次虎頭門小張元帥以所部來降黃通志

偽參政邵宗愚據三山寨遣人約降遷延不至永忠知其詐乃發兵直抵其寨破之獲宗愚宗愚兄弟俱殘暴嗜殺嘗再陷廣州大肆侵掠廣州民尤嫉之及面縛入城民爭唾其面遂與其徒皆棄市新會土豪黃彬河源曹文昌英州廖仁等復聚眾作亂自稱元帥永忠復捕誅之南海縣人麥康祖以魘魅蠱毒殺人又捕斬之廣州平明典

伯顏子中其先西域人後仕江西因家焉子中仕元為吏部侍郎持節發廣東何真兵救閩至則真已降於廖永忠子中跳墮馬折一足至軍前永忠欲脅之不屈永忠義而舍之陳友定傳

三年八月始選士黃通志貢額廣西廣東皆二十五人才多或不及者不拘額數選舉志

廣東行省周楨聘禮名儒以典文衡得李初等十二人明年舉進士者六人黃通志

五年四月廣州地震八月廣州地震西北有聲如雷地坼三里許阮通志

布政司參議王綱至增城遇盜死之增城志



六年廣州天雨米如早白穀二申野錄

時廣州天雨米如早白穀米身粗小長黑色如火燒米炊

蒸之為飯甚柔軟人爭掃拾有取至二三斗者黃通志

十二月廣州衛指揮僉事楊璟討平海北諸盜黃通志

壬子五月海賊李夫人鍾萬戶徐仙姑數於海晏下川大

儋文特等地劫掠璟同指揮范懷率舟師勦捕至陽江海

陵遇賊船二百艘擊敗之斬偽總兵李福全李夫人賊眾

一百七十人隨率舟師至繼頭山遇賊船出洋督官軍追

至速頭港與戰至那泥港殺溺甚眾擒偽總兵陳貴等二

十八人斬於軍前黃通志

七年八月罷廣州採珠黃通志

東莞知縣詹勗同官兵採珠於大海自四月至八月止得

半斤詔罷之黃通志

十月廣州黑氣亘天黃通志

十年十一月免廣東田租明史太祖紀

十二年朱亮祖出鎮廣東朱亮祖傳

亮祖勇悍善戰而不知學所為多不法番禺知縣道同以

聞亮祖誣奏道同死尋悟明年九月召亮祖至與其子暹

俱鞭死御製墳志仍以侯禮葬朱亮祖傳

十三年永嘉侯朱亮祖都指揮使許良呂源以舊城低隘上

疏請連三城為一闢東北山麓以廣之郭通志

拓北城八百餘丈建立五層樓為會城壯觀郭通志

謹案阮通志云此條黃志載在十一年郭通志移在

七年俱不知何據及查郭志城池一門又云在十三



年與事紀歲月自相矛盾然亮祖出鎮既在十二年則修城在十三年較可信也

十二月廣州大雨風雷地震明史五行志

十四年十一月趙庸討廣州海寇大破之太祖紀

十五年春正月丁亥南雄侯趙庸率兵討東莞諸盜平之黃通志

凡克寨十二擒賊首十餘人斬首二千級招降翁源等縣

復業人民三千餘戶甲辰進兵攻破東莞縣石鼓赤嶺等

寨擒偽官百餘人餘黨潰散黃通志

三月命南雄侯趙庸籍廣州蠶戶萬人為水軍時蠶人附海

島無定居或寇盜故籍而用之明典彙

蠶戶者以舟楫為宅捕魚為業或編蓬瀕水而居謂之水

欄見水色則知有龍故又曰龍戶齊民則目為蠶家雜居

自唐以來計丁輸課於官至是編戶立里長屬河泊所歲

收魚課東莞增城新會香山以至惠潮尤多顧炎武天下郡國利病書

十九年東莞龍川興甯南海香山翁源民作亂廣州左衛花

茂統兵討平之粵大記

謹案黃通志云東莞賊曹真作亂命南雄侯趙庸討

平之與此詳畧互異

二十年大有年南海志

二十二年都指揮同知花茂擊南海香山黃連等寨粵大記

二十四年五月都指揮同知花茂收集民兵黃通志

茂勦平陽春等縣賊及清遠英德翁源博羅東莞增城龍

川興甯歸善南海香山諸縣及海南雷州等處山寨徭賊



蠻賊及倭賊至是升都指揮同知因上言廣州地方若東莞香山等縣逋逃蠻戶附居海島遇官軍即稱捕魚遇蕃賊即同為惡不時出沒劫掠殊難管轄請徙其人為兵又奏添設沿海依山碣石神電等二十四衛所城池收集海民置軍守禦仍於要害山口海口撥軍屯守詔皆從之

利病書

謹案阮通志海防畧引明史花茂傳以此為洪武十七年事考花茂傳無年月可證茲從黃通志及郡國利病書

夏南海大水

南海志

秋大旱

南海志

十月廣州大毀寺觀

黃通志

先是五月有詔令天下郡縣止存寺觀一區並為叢林廣州至是始行之

黃通志

二十六年都指揮花茂平三竈賊

香山志

三竈山抵海洋蕃國有田三百餘頃極其膏腴粒之香美甲於一方在宋為黃字上下二圍元時海寇劉進據之洪武初屬黃梁籍居民吳進添通蕃為亂花茂奏討平之悉遷其餘黨詔虛其田除豁田稅永不許耕歲令官軍千人防守

香山志

十一月己未東莞叛寇何迪伏誅

黃通志

迪東莞伯何真弟也真次子宏以罪誅迪自疑禍及遂聚眾作亂南海衛以兵捕之迪伏眾襲殺官軍三百餘人遁入海島廣東都指揮使司發兵進擊敗之械迪送京師誅



之黃通志

二十七年花茂上言請徙廣東沿海地方東莞香山等縣逋逃疍戶為兵粵大記

案郡國利病書所載與此畧相同而時不同或同一事而傳聞各異或山海之叢蠻蠻繁雜編徙之後地

二十八八年香山大橫琴山寇平詔虛其地初元末海寇王一據之香山志

大旱香山志

二十九年徙三竈民為兵民徙而糧存秋糧七百石責里甲派貼黃梁都民黃宏道聞官請於朝蠲除之香山志

三十一年春三月從化縣賊鍾均道寇南韶命指揮王濬等

討平之郡國利病書

四月禁廣東通番黃通志

始禁番船商及夷人毋得入廣州城郡國利病書

謹案郡國利病書載此事於洪武三十八年八字疑誤今移載於此

大有年南海志

三十三年三月從化縣賊首鍾均道降郡國利病書

詔以為本縣扶溪巡檢司副巡檢郡國利病書

成祖永樂元年五月南海番禺潮溢明史五行志

七月詔選女官於廣州黃通志

詔求民間識字婦女充六尚內職先是京城既定用兵以清宮禁建文中六尚等局女官俱誅死故求補之南海女



子王氏等被選入官 黃通志

八月東莞嘉禾生 東莞志

一莖三穗生厚街王氏菊堂 東莞志

二年五月豐城侯李彬清遠伯王友充總兵官率舟師巡海

成祖紀

三年修廣東南海衛蓮塘上下陂田隄岸 黃通志

五年春三月雨雹 南海志

七年四月廣州大雨水 黃通志

八年大水 番禺志

九年冬廣州大有年 黃通志

十二年秋番禺縣民一乳三子 黃通志

永樂癸巳秋民人何卓妻林氏一乳三子名泰謙渙有司

以其事聞賜寶鈔十錠米五石仍月賜育養米五斗且下令無子之家分乳其子 黃通志

十三年大鵬千戶所吏目鄭參告本所千戶徐斌竊取珠螺巡按及二司委官勘實以聞遂報罷且禁竊取以啟事端 黃通志

南海大水 南海志

南海冬雪梅枯死 南海志

十七年夏番禺大雹 番禺志

二十年五月廣東諸府潮溢漂廬舍壞倉糧溺死三百六十餘人 明史五行志

二十一年香山嘉禾生於龍眼里 香山志

仁宗洪熙元年春正月詔弛珠池金銀坑冶之禁 黃通志



是月十五日詔廣東珠池及各處官封金銀場仍前禁止外其各處山場田林湖池坑冶及果樹蜂蜜等聽民采取不許禁約郭通志

五月南海颶風水漲南海志

宣宗宣德元年十月廣州大雨水黃通志

二年二月南海水民大饑南海志

三年三月禁採番禺縣鉛鈔黃通志

先是廣東都司奏縣民有私取鉛鈔者門卒獲之究其所出在番禺縣西取砂烹煉可得白金錫鉛當罪私取者并請官開冶上曰山澤之利民取之勿問冶不可遽開命巡按御史勘視具實以聞至是御史何善奏同三司官發工匠民丁等深入巖洞取沙礦每百斤煉銀止四錢鉛二十

斤所得不償所費令有司悉填坑洞國家之利不藉此民亦免逐末之弊黃通志引實錄

五月南海饑黃通志

十年冬十一月香山雷香山志

英宗正統元年七月廣東淫雨傷稼明史五行志

五年番禺地震番禺志

番禺大有年番禺志

六年二月廣東蝗二申野錄

七年壬戌新會盜起剽掠鄉村遣指揮朱端知縣陶啟招撫不能息復遣指揮王英進剿擒賊首周義長繫獄後竟以賄釋由是諸盜益熾新會志

八年癸亥秋廣州饑郭通志



戶部行文令義民出粟賑濟者冠帶榮身郭通志

十年九月廣東衛所大水明史五行志

十三年命印綬監左監丞阮能鎮守廣東黃通志

能為人奸險唇缺貌陋以賂得鎮守廣東多為不法民家

有一佳器必假事擒縛得銀乃釋多鑄大錠呼為我兒時

以舌舐童謠曰崩口阮要人吮廣人苦之黃通志

十四年新會大嶺村賊作亂賊首黃汝通起兵應白水洞盜

五月之間眾至三千餘剽掠船頭石灑沖上沖等十二村官

軍剿之遇赦引還益猖獗新會志

八月廣東賊黃蕭養作亂景帝紀

九月總兵官安鄉伯張安討廣州賊敗死指揮僉事王清被

執死之參議楊信民為右僉都御史討廣東賊景帝紀

十二月都督同知董興為左副總兵討廣東賊戶部侍郎孟

鑑參贊軍務景帝紀

南海賊黃蕭養者冲鶴堡人貌甚陋眇一目而有智數坐

盜在郡獄逾年所卧竹牀皮忽青色漸生竹葉同禁者江

西一商人謂曰此祥瑞也因教以不軌使人藏利斧飯桶

中破肘鐐越獄而出凡十九人商人亦逸去不知所在官

隸獄卒追之蕭養揮斧而行人莫敢近其黨駕船以待遂

入海潛遁正統十三年九月也於是嘯聚羣盜旬月至萬

餘人十四年三月攻圍郡城官軍禦之輒敗製雲梯呂公

車衝城幾為所破設偽官招誘愚民漸至十餘萬都指揮

王清自高州引兵赴援至廣州舟膠水淺有小艇載柴及

鹽魚者奔迸若避賊狀官軍問蕭養所在言未脫口伏兵



出柴中擒清盡殲其軍城中震恐三司官登城望之刃矢

森發相顧流涕而已

雙槐歲鈔

張安帥舟師遇賊破船澳方醉卧官軍不能支退至沙角

尾賊薄之軍潰安溺死

董興傳

王清字一甯慷慨多勇略嘗出塞屢立奇功至是失利被

執罵賊不屈死蕭養乘勝志氣益橫僭稱東陽王改元授

偽官百餘人據五羊驛為行宮四出剽掠

粵大記

景泰帝元年庚午春二月大星殞於廣州河南

黃通志

五月

當作四月

董興擊破廣東賊黃蕭養伏誅

景帝紀

興等進兵時天文生馬軾隨行至江西夜半聞鷄鳴問之

曰此何祥也對曰鷄不以時鳴實由賞罰不明願公嚴軍

令及經清遠峽有白魚入舟中軾曰此逆賊授首之兆也

時蕭養聚船河南千餘艘其勢甚張眾欲請兵軾曰兵貴

神速若請兵則援不及事以所徵兩廣江西狼兵取勝猶

拉朽耳興從之四月師至大洲頭與賊遇大破之蕭養中

流矢為官軍所擒伏誅餘黨悉平詔孟鑑代信民巡撫乃

析南海沖鶴大良諸堡為縣名曰順德

雙槐歲鈔

楊信民舊為廣東參議有惠政將至賊眾漸散蕭養求見

於城濠之南信民單車出止水次蕭養曰豈真吾楊父母

耶信民下車揮左右岸幘示之賊眾羅拜四月十一日興

率官軍至大洲頭與賊遇大破之信民使人持檄諭降蕭

養曰楊大人父母也當徐思之賊獲鉅魚以獻信民受而

斬數十鬻賜各部賊出嘆曰兆不祥矣叛蕭養者漸眾留

者不滿千會信民中毒卒鑑益招徠蕭養手下衣貌同者



數十人官莫能辨乃以響箭向空而射蕭養仰視一箭直貫其喉遂為官軍所擒伏誅詔鑑代信民順德志

謹案蕭養之破明史在五月而黃通志郭通志均在四月當時親見其事聞見較真蓋平賊在四月而奏報在五月也當從通志為長

香山龍眼里大欖二村香山志

不播而穫曰稽二村民以黃寇脅從致水軍之討無妄之災也香山志

參政黎璉往守新會招撫而還郡國利病書

春正月朔周義長李丙統賊三百餘徒圍冲翼村擄張凱張寅妻子盡殺之寅妻蘇氏有美色周義長欲留妻之蘇氏不從竟罵賊投水而死聞者哀之閏正月初八日賊首

區蠶家黃三温觀彩駕船五百餘艘泊曹婆渡從獅子山劫掠黎峒村居民俱走薛公巖時總甲曹桂林等設策令家各置藥酒俟賊入飲之纔行統眾追之賊入藥發山路險阻不能走死者二百餘人時參政黎璉都指揮張玉已於正月間統軍一千守新會城候大軍未發城外居屋先為區蠶家燒毀人民奔竄入城鄉村逃難至城者俱無止踵流離不可言多叛從賊受偽官攻城劫村大肆猖獗正月初四日黃蕭養既攻廣殺死指揮王清敗沒安鄉伯官軍遂乘勝連本縣賊首黃三等船二千餘艘眾至三萬餘急攻新會城欲取黎張二公勢迫迺開城門引兵出汾水岡與賊大戰數合互有傷敗官軍死者六十餘人賊鋒大斲傷死者不計由是稍退五月二十九日指揮馮英等官



統兵至新會仍屬參政黎璉提督時既殺黃蕭養各官意  
怠諸賊縱詭計行間緩兵主者遂蹈其策乃以招撫為名  
遷延不進至六月十二日諸軍徐至獨岡斗崗等處仍行  
招撫至十九日始進兵百峯山下塘田等處官兵共六  
萬五千餘分劄十二營其時諸賊黃三等各潛入大柴型  
等山立寨連日抵巢招撫七月初九日惟黃三受招下山  
其餘諸賊劉積温觀彩等竟不服招八月十三日各官皆  
引還民間相傳以為黎璉納其賄故不加兵云黃通志  
二年春新會各賊復發晝夜剽掠居民不勝荼毒劉灝伍崇  
長等一百六十名赴京具奏十二月準行剿捕郡國利病書  
夏六月雨雹狀如牛頭秋冬大旱順德志  
三年二月鎮守廣東戶部左侍郎揭稽並巡撫御史三司等

官親臨新會新會志

時眾議以山原險阻難以用兵草間寇竊勝之不武由是  
遂令官吏林烜等虛作甯靖保結抵罪奏入而返人民含  
冤諸盜縱橫日甚時有童謠云壓倒生民入於貝戎人死  
不顧虛鎮廣東新會志

四月海賊寇掠海豐新會總捕都指揮僉事杜信與戰死之  
參政謝祐副使項忠遣指揮張通等往剿賊遂遁去備倭僉  
事王俊有罪伏誅黃通志

鎮守廣東左監阮能左副總兵董興使杜信往剿海賊被  
殺復遣指揮歐信等分路追之惟王俊追至清水澳不獲  
還至荔支灣海面獲白船一隻俊取其檳榔蘇木等物縱  
賊開洋而遁為中監錦衣百戶許昇告發祐忠等追得俊



賊阮能等奏聞俊當斬有旨就彼處決號令於是誅俊黃通志

五月官軍剿新會松柏山那度等處餘匪平之新會志

時新會餘賊復發巡按御史王瑾見其猖獗日甚不得已方遣僉事蔣敬都指揮胡英領兵合諸縣民兵四千餘剿

捕新會志

五月二十九日進兵直抵松柏山那扶等處攻圍上下二

尚悉力擒捕賊徒盡數剿戮捉獲人畜無算由是各處盜

賊聞風遁散時蔣敬意在翦除間忽因都督董興遣人追

回議事遂各引還聽招諸賊復出剽掠新會志

五年大水南海志

新會前賊復作都御史馬昂復遣都指揮徐恭參議朱英副

使顧侃等親臨擒捕新會志

時各官猶踵前失惟往新會城遣人招撫間眾賊復剽掠

鄉村殺害葉宥奴等人口六十餘縣令亦欲息兵竟匿不

聞各官不知由是縣賊狎玩畧無畏忌旋招旋叛不能已

方大圖征剿十二月初二日都督翁信率三司等官統廣

東軍駐新會僉事成功等統廣西等處軍駐蜆岡都指揮

張通等駐材蚶參議朱英等駐天湖萌刻期進兵分據各

賊要害塘田油濫步等處大小三十餘營官軍土兵計一

十餘萬戰船及運糧船隻共四千餘艘新會志

七年官軍破黃泥型等山寨遂圍白水洋衝二崗奏捷而還

縣丞陶魯立鄉老以約束之於是新會乃平郡國利病書

正月初四日遣都指揮干羽胡英等統領各軍進山先破



黃烈等山寨生擒劉三仔父母妻子及各賊妻子又破曲水圍鼈塘等處山寨十六日都指揮胡英圍白水洋冲二崗斬獲賊首張陳保會四古等首級一百餘都指揮馬圍蔣崗等村斬獲賊首温三廣温康二温祖奴等首級二十餘人及沉水滄死生擒人口不計渠魁既盡各官乃解軍引還尙遺殘寇留指揮王英新會縣丞陶魯相機剿獲乃安撫諸村良民是年七月魯歷遍諸村設立鄉老置木牌開寫各戶丁口逐月開報諸村動息每五十家仍立總甲一名管束出入互相勸戒自是盜賊斂跡居民始獲安堵

新會志

八月香山卿雲見黃通志

八年城西有虎暴南海志

景泰時新會陽江有賊數萬總戎趙輔檄僉事顧儼剿之儼提兵五千直擣賊巢斬首千餘級追復被擄男女千餘人牛

馬什器無算焦茲獻徵錄按阮通志次於此

英宗天順元年春三月順德大旱順德志

七月詔赦除天下課程拖欠廣東獨名爲蠲免實則追徵自

是以爲常例黃通志引實錄

二年三月海寇犯香山千戶所黃通志

廣東副總兵都督同知翁信奏海賊四百餘徒犯香山千戶所燒燬備邊大船其都指揮張通總管不嚴是致失機乞正罪章下都察院請逮問如律別委武臣代之上令殺賊贖前罪十二月陞廣東備倭都司指揮同知張通按察司僉事謝璫及官軍十人俱一級一百二十五人賞有差



以新獲海賊故也郡國利病書

七月海賊嚴啟盛寇香山東莞等處巡撫右僉都御史葉盛

討平之郡國利病書

先是啟盛坐死囚漳州府越獄聚徒下海為患敵殺官軍

拘留都指揮王雄至廣東復殺總督備倭都指揮杜信至

是招引蕃舶駕至香山沙尾外洋盛廉其實會同鎮守廣

東左少監阮能巡按御史呂益命官軍駕大船衝之遂生

擒啟盛餘黨悉平粵大記

三年順德大水順德志

九月廣西流賊犯廣州黃通志

鎮守廣東左少監阮能奏廣西流賊萬餘侵犯廣州府界

即今珠場採辦屢被驚擾其勢猖獗流劫鄉村殆遍若不

早為區處竊恐貽害無窮兵部請降勅諭巡撫兩廣右僉

都御史葉盛并總兵鎮守等官調度所在官軍士兵民壯

剿除從之黃通志引實錄

五年順德大饑順德志

新會嘉禾生二申野錄

邑之平安甲產嘉禾十餘本九穗三本七穗四本六穗五

穗皆八本黃通志

十月廣州城西有虎暴郭通志

是年廣西流賊多入廣東為害兩鎮將官不協各分彼此討

賊無功明典彙

六年春廣西賊入寇新會民多被擄縣丞陶魯募邑之才

弟有恒產者號敢勇兵討平之自是陶魯名益彰尋擢知縣



廣州府志 卷之十八

黃通志

四月廣州芝草生黃通志

四月十三日市舶司天珍堂石柱連產玉芝尺餘者三莖

並秀黃志引舊志

新會蝗新會志

七年八月賊攻破新會外郭右布政使張瑄往援賊退督修

其郭濬池湟周圍數十里城守益固新會志

廣西流賊攻破清遠縣城殺擄軍民甚眾是年兩廣饑清遠志

八年春正月詔免廣東稅役黃通志

是月二十二日詔廣東等處賊寇生發多因官司采辦物

件守令不得其人以致饑寒迫身不得已嘯聚為盜情犯

雖重詔書到日能悔過自散悉宥其罪尸下拖欠稅糧等

項悉皆蠲免仍免雜差泛役三年郭通志

有虎在順德倫敦傷人順德志

憲宗成化元年春大水順德志

夏六月十七日順德雨粟形如米色黑而堅歲大饑順德志

謹案黃通志云米色犁黑形小而粒堅婦人掃拾之

有聚得升斗者咸以為時和歲豐之瑞焉然是年順

德歲饑則亦不得以為祥瑞也

十一月詔兩廣盜賊生發去處軍民饑寒所迫流移他處不

得已相聚為盜詔書到日許令自新免其糧差二年官司善

加撫恤黃通志

二年順德大饑順德志

三年秋廣州饑黃通志

廣州府志 卷之十八

前事畧四

未



六年兩廣饑明史五行志

謹案阮通志載此事於天順六年誤

順德大水黃通志

七年春三月兩雹狀如牛頭大有年順德志

八年春正月廣州旱黃通志

七月順德大雨水順德志

十年七月廣州大雨水黃通志

十一年秋颶風鹽水上田禾半壞南海志

冬十一月兩廣水災免田租黃通志

十四年夏四月增城地震天鳴如鐘增城志

謹案增城志云二十四日清遠志云十三夜兩書不同今具錄之以備考

十六年夏四月縣民陳猷陳顯葉禘等謀作亂知縣丁積及指揮倪麟誅之新會志

五月香山地震黃通志

十七年夏五月增城大水黃通志

十八年春三月順德地震順德志

夏四月水災至秋八月始退歲饑順德志

十九年五月香山海水溢黃通志

九月十一日大水北江漲淹浸田禾次年正月布政司陳選

行文開倉賑濟清遠志

南海大有年南海志

二十年清遠雨雹大如拳明史五行志

二十一年三月己丑夜番禺南海風雷大作飛雹交下壞民



居萬餘死者千餘人明史五行志

順德兩雹是冬大饑黃通志

二十二年免廣東被災稅糧明史憲宗紀

二十三年春正月朔白氣亘天其色如練漸升漸消消盡復

有聲如雷頃之乃滅順德志

五月廣州地震黃通志

秋八月二十三日夜地大震搖居民房屋順德志

孝宗宏治元年正月廣州有蝗野錄

謹案黃通志作有蜚與此異

黃祖成聚眾據藍漢山為盜增城志

宏治初未置龍門山寇因採鐵起西北一路多東莞新會之匪東南一路多程鄉海豐之姦依山鼓鑄爭利相鬪西

北掩東南而殺之踞舊漢帽子峯七坑等處西林之民附

焉遂成大亂龍門志

番禺縣盜譚觀福作亂僉事陶魯討平之黃通志

二年秋九月番禺縣盜姚觀祖等伏誅黃通志

謹案阮通志引此作譚觀福疑誤

三年香山虎暴四月有豺香山志

冬十二月香山芝草生香山志

四年三月逮兩廣總督秦紘尋免歸通鑑輯覽

總督秦紘奏請用兵命帥府苗某督兵進剿賊預設伏於

牛井朗中兵至伏發苗帥與一參軍一遊擊俱死之龍門志

五年廣州潮州俱大水南海饑黃通志

南海基圍振潰禾稼蕩盡有司命工築補賑濟流民一萬



餘人黃通志

龍門盜茹白鬚等伏誅採訪冊

守備王守忠獻策募鄉勇詹邨人戴琳與弟瓊率勇士應募身為前導官兵隨之大捷連擄賊十七寨生擒賊首茹白鬚何跳牆鄧福壽高任子江天青等斬首數千餘黨潛窟山谷寇平始建縣治焉龍門志

六年番彝入寇東莞所千戶袁光捕剿於岑子澳死之新安志

順德雨雹大如彈丸黃通志

夏五月順德大水民大饑順德志

香山虎暴香山志

九年夏六月初二日夜半地大震順德志

十年十二月廣州知府林泮奉總督檄會總兵征藍蠻諸山

洞蠻入其穴擒渠賊殲之明典彙

十一年春二月順德大饑勸民入粟順德志

夏六月東莞地震東莞志

十二年南海番禺大饑黃通志

東莞增城亦饑勸民入穀黃通志

十四年夏廣州大水黃通志

新會饑新會志

十五年春三月雨雹折樹木破房屋壓死鳥雀無數歲則大

熟穀每石五十錢南海志

十六年南海番禺大水郭通志

秋九月海溢壞稼東莞志

十七年新會饑新會志



築東莞增城隄岸黃通志

時東莞隆福隄久頽增城上蘭下蘭二都沙濬埤墟亦圯

至是並命築之黃通志

詔採無患子於廣州黃通志

十八年十一月廣東右布政柴昇設法撫諭十三村積賊捷

聞賜銀幣獎之明典彙

廣東盜起陞松江同知吳廷舉為廣東兵備僉事征十三村

池水盜平之明典彙

謹案阮通志云明典彙作正德四年十月據明史本

傳廷舉於宏治十年遷成都同知夏歸補松江同知

尙書馬文升劉大夏薦擢廣東僉事從總督潘蕃平

南海清遠諸盜事在正德以前故附錄於十八年柴

昇一則之後

武宗正德元年增城人邱帥聚眾為盜知縣鄭行計擒之增城志

二年七月順德慶雲見順德志

三年九月新甯蝗黃通志

香山饑香山志

順德有虎害人順德志

討東莞塘貝盜平之黃通志

四年順德羊額盧景春家有母犬能作人言生兩子抱而乳

之近犬禍也黃通志

五年四月詔兩廣等處連年災傷人民艱窘各該有司加意

賑恤流民復業者免其賦役三年其嘯聚山澤流劫鄉村者



廣州府志卷之二十一  
仍照節次旨意出榜曉諭有能悔過自首悉與免罪自相擒斬者量為陞賞擒斬有名首惡者不次陞用黃通志

七月廣州慶雲見黃通志

六年新會增城蝗黃通志

婺郡城道路黃通志

左布政使羅榮科罰里長老人人率一金婺郡城道路人甚苦之黃通志

正德間寇劫寢甚新會知縣張文造設鄉村長以約之朔望開報其村之動靜有為非輒覺察擒獲時頗畏服踰年張卒盜如故是後益橫郡國利病書

七年十一月廣州有火如龍起於石人馬辟易二申野錄

八年正月新會旱饑新會志

十四年二月香山雨雹黃通志

新會饑黃通志

增城地震黃通志

從化盜應林等平黃通志

逐佛郎機夷人出境黃通志

新甯清遠恩平賊亂都御史楊旦討平之郭通志

楊榮曾孫旦總督兩廣軍務討平番禺清遠河源諸徭明史

十五年三月兵備王大用征新甯羊公逕盜新甯志

四月清遠大水招撫清遠盜賊黃通志

十二月攻温邊盜不克羣盜圍城三日乃解新甯志

兵備副使王大用統兵剿捕以盜攻盜諭以功贖罪由是



先殄其甚者羊公逕上下平山盜賊授首餘皆喪膽捕人至即自投歸官前後捕獲凡六千餘人大用見其威易行欲盡圖温邊白石不克十二月初五遂至圍城數日既而招撫散兵典史鄭翹獨守孤城自後賊首許車保起於白石陸四起於大萌聲勢大肆剽掠鄉村居民逸窟郡國利病書

冬番禺大雨水番禺志

十六年大良民劉華妻何氏一乳三子黃通志

正德中奸民與畚蠻按閩潮人逃叛流亡就地墾荒者謂盜之畚蠻畚兵之名見元史即此類採雞柏村銀礦畚蠻嶺海隨處皆有之以刀耕火種為名者也衣服言語漸同齊民然性甚狡黠每田熟報稅與里胥為奸里胥亦憑之近海則通蕃人峒則通獠凡田潭礦場有利者皆糾合為匿以欺官府其害憐於甲兵廣惠雷廉罹其毒

螫而事不發者里胥庇之也惠之歸善海豐廣之從化香山皆有銀礦畚蠻招集惡少投託里胥假為文移開礦取銀同行劫掠香山恭常都雞柏村銀涌角宋初產銀取上供屬廣州宜祿場案文獻通考嶺南諸軍產銀者三場五十大觀中廣東廉訪使黃烈奏言礦內脈苗微甚而浮冗之人以納官為名發毀民田騷動邀販詔罷宜祿場令官封之違禁者誅逾三百年人無敢發者至是順德豪民勾引勢家糾集逃叛及白水賊徒捏朝旨執詔開礦採煎村民初猶拒之其後力不能勝盡被屠戮而淫其妻女使供炊爨每歲得銀漸至千餘兩嘉靖甲辰苗脈已盡賊徒乃散然其地雞犬桑柘亦俱盡矣邇來海氛滋多皆此類郡國利病書世宗嘉靖元年新會盜起引倭寇黃梁都沿海民多遭殺掠



十年始平之

香山志

增城良田賊黃雪梅掠縣北門外兵備道王大用知縣朱文簡率兵剿之伏誅

增城志

二年以羣盜連年猖獗於是徵諸路兵剿諸巢穴斬賊首萬計而布政使章拯

郡國利病書作張拯

濫殺頗及無辜

新會志

嘉靖二年閏四月調集土兵合官民兵一萬餘右布政使張拯駐新會參政葛拈叅將李璋駐新甯副使王大順駐恩平知府簡沛駐海晏遣兵四出剿捕先是累年征剿祇用民兵諸賊玩習無忌及是狼兵已至賊猶未知先抵蓮塘八帶羊公逕石鼓山諸寨各賊妻子戲笑自若咸相呼出寨曰今日看殺這民壯仔以故狼兵突至得盡戮諸賊妻子遂乘勝追殺温邊白石等處羣賊望風喪膽竄走百

峯山諸處藏匿時張在新會凡獲盜令於路中識別同類隨賊所指卽執而戮之沛在海晏亦多殺戮桀魁陸四兵敗亡命沛輒指平民藏匿因緣爲利凡客居海晏者咸受其辜惟葛用兵有紀淑慝分明時有諺云遇葛李則生遇張簡必死後陸四竟不獲旋師之後知縣胡綸用盜羅九之計以老人岑益入寨爲質誘出殺之各寨魁授首黨與幾盡所餘渠者惟陸四數人惜其旋師太驟不旋踵餘孽陸策等復作招集各鄉逃叛及通西山賊入境圍村捉擄人口殺人報仇尤慘於前五年兵備副使徐度遣縣丞林應總統民兵征捕不能平

郡國利病書

二月佛郎機國人別都盧寇廣東守臣捕獲之巡撫張嶺巡按涂敬以聞上命就所在誅之

郭通志



謹案香山海防志嘉靖二年佛朗機寇新會之草灣  
指揮柯榮百戶王應恩敗之與此當同一事

秋八月東莞大雨水東莞志

新甯雨血阮通志

三年春正月順德雨雹大如卵壞居民房屋傷死鳥獸順德志

夏新甯餘盜陸廣陸策復起陸四子也新甯志

四年秋冬順德淫雨明春始息順德志

新會雨雹阮通志

香山蓮塘民鄭七子妻一產三子阮通志

五年四月兵備徐度誅賊首林子祥十月兵還新甯志

秋順德蝗蟲傷稼順德志

順德縣龍潭民王伯先牝犬生四蛇併犬殺之犬腹內有一

蛇又殺之亦犬禍也阮通志

六年新會新甯民賊亂都御史姚鏞太監鄭潤總兵撫甯侯

宋麟討平之郡國利病書

先是蓼塘旱塘長塘等處民雷骨子林子祥湯孛等聚眾

流劫地方蒙禍嘉靖癸未曾經大征漏誅復出流劫斗崗

大巷潮透等鄉至是都御史姚鏞總鎮太監鄭潤總兵撫

甯侯朱麟其郡國利病書作朱麟等行委嶺南道守巡副使徐度郡國利病書作徐度

徐夔書作徐夔左參議周震督備都指揮王蘭督領打手一千三百

餘名分道夾攻俘斬三百七十名餘黨悉平黃通志

增城大風雨害稼壞民居增城志

七年香山春正月不雨至於夏六月香山志

三月增城縣民湯氏嫗家產一豕豕身豕頭面手足皆人增城志



夏順德螟傷早稻順德志

十一月兵備徐乾來新甯撫羣盜新甯志

八年秋新甯颶風壞官民居新甯志

九年三水二月不雨至冬十月乃雨三水志

八月三水有神龍變化於金洲江上三水志

天日清明忽元雲垂金洲海上須臾有一巨鯉化龍從東

北飛去三水志

順德旱蝗蟲殺稼歲大饑順德志

秋九月順德地震有聲如雷順德志

香山饑香山志

十年二月兵備莫相總兵張天裕帥兵征新甯羣盜新甯志

九月海賊黃秀山等亂提督侍郎林富討平之郭通志

秀山東莞人與黎國璽乘船出海旬集潮惠雷廉閩浙亡

命屯據海洋妄自稱號剽掠商民多被其害至是富督副

使江良材參議王積叅將程鑒等調集舟師分道夾攻俘

斬二百餘人獲秀山等戮於市郭通志

十月僉事龔大稔撫廣海海寇新甯志

新會新甯賊亂提督林富討平之郭通志

先是二邑各巢劇賊據險為患正德末猖獗尤甚嘉靖二

年徵兵大舉斬首萬計而大隆相尚等山賊首曾友富宗

英方長輩皆未獲復聚眾流劫富乃調集漢狼兵三萬二

千分兩道討之俘斬一千九百人餘黨降郭通志

謹案郡國利病書嘉靖九年會甯民賊復亂提督兵



部右侍郎兼右僉事都御史林富總鎮太監張賜總兵咸甯侯仇鸞討平之與郭通志異蓋賊亂在九年而討降在十年也

新會有虎暴

新會志

十一年夏六月望五色雲見於三水之西南方

三水志

十二年海寇許折桂温宗善入寇東莞千戶顧晟追捕於春花洋戰死後海道江良材平之

新安志

江遣知縣林啓祭晟有勇哉男子天何不佑之語

新安志

十三年甲午春正月十八日順德大風渡船被覆溺死傷五十餘人

順德志

十四年夏五月廣肇南韶四郡大水御史戴璟賑活甚眾奏蠲田租

郭通志

十五年春二月順德雨雹損壞居民房屋

順德志

廣州肇慶韶州大旱

郭通志

是年春大饑復大旱民不耕作者益窮迫新會外海游民嘯聚數百艘欲出海行劫知縣陳豪曰此非叛民欲苟延旦夕耳於是開倉賑給人米二石人皆帖然又潮連大獨貧民病其鄉富戶閉糶不肯借貸遂與南海逸囚區勝祥等倡亂出海豪告於海道副使葉照兵道僉事朱道瀾募兵分守要害招聖祥降之地方賴安

新會志

謹案大獨鄉名今作蠶新會王志作大毒

新甯張邊羣盜起副使葉昭來征

新甯志

十六年夏四月從化增城地震

從化增城志

十七年五月兵備李文鳳征張邊盜平之

新甯志



兵備僉事李文鳳以十五年新會首賊許文盛鄺悅敬等  
潛據張邊糾合背招賊徒鄒田等並起東瓜冲冷水坑等  
處剽掠劫殺歲無甯日發兵剿捕遂平張邊而東瓜冲冷  
水坑等寨許鄺諸賊俱逃竄姑從千戶劉冕計撫安秋七  
月許鄺背招復亂知縣劉曉計獲首賊許鄺殺之羣黨屏  
息新甯志

十八年冬十月香山新會地震香山新會志

十九年夏四月初八日順德地震順德志

五月三水大水三水志

秋九月順德地復震順德志

熒惑犯南斗浹旬間兩犯郭通志

二十年順德大饑順德志

二十一年清遠大小羅山賊流劫總兵安遠侯柳珣率兵至  
清遠峽遇賊斬其魁平之清遠志

二十二年四月十三日龍起雷潭壞官民舍新甯志

五月三水大水三水志

新甯知縣王臣獲盜白宗賢等五人新甯志

二十三年四月颶風大雨壞官民舍新甯志

二十四年夏大饑三水志

十二月癸卯日旁黑氣如盤與日相盪七日乃滅郭通志

是年清遠興仁鄉楊梅村前地一夕夫雷雨傾陷為潭未幾

村有火災賴潭水得救清遠志

二十五年夏五月新安潦潮大溢新安志

秋九月颶風溺死農民甚眾順德志



十一月官軍討峒賊陳以明等平之新甯志

先是新甯新興恩平之間皆高山叢箐奸惡亡命竄入諸徭中吏不得捕遂聚至萬人推以明為主號承天霸王流劫諸處官軍討之數敗督撫侍郎談愷檄諸路土兵進剿破之斬其偽飛虎將軍伍廷章等乘勝攻各巢賊平

明典彙

香山知縣鄧遷以三竈餘田歸官備賑香山志

初既虛三竈地其田永不許耕正德中南海勢家以新會虛稅影佔亡命之徒附之招合畚蠻立為十里聚眾盜耕嘉靖十五年該都里排贖為己業已而有錢備者素通蕃舶恃強冒奪與畚蠻霸耕偽立文案與里排分上下圍管業至是鄧遷申明上司丈量餘田歸官收租貯預備倉里

排與通徭畚蠻仍復侵據號召海寇大為民害郡國利病書

二十六年春三月淫雨苗以冷而槁死歲大饑順德志

新會雨血新會志

秋增城黑告見踰月乃已增城志

香山縣知縣鄧遷清釐寄庄積弊香山志

鄰縣糧戶在縣屬編徵者謂之寄莊香山田糧二萬二千

有奇順德新會番禺南海寄莊八千餘新會志

東莞縣西大步出嘉穀大如扁豆粒粳甲朔彪如文綬阮通志

二十七年春新甯上橋賊起新甯志

新會縣謝邊賊起知縣林騰蛟計擒賊首謝大用誅之後又

以計誅長潭賊首何二等餘黨悉平新會志

是年順德大水順德志



二十八年夏四月吳孔清區文嶺及恩平伍崖風新會何老  
貓鄧四等盜蜂起新會志

羣盜二千餘徒流劫蜆崗驛官吏財物巡撫張經兵備陳  
梧巖飭各哨守官員住俸戴罪平賊通判王輅出令但執  
渠魁脅從罔治知縣張國器置牌數面書令其中遣民壯  
執牌沿寨曉諭自是竹源寨殺賊首區文嶺石鼓寨殺賊  
首許松林生縛黃各數人解官明年秋新會知縣尹照督  
同典史吳一鶚總甲鍾學計誘吳孔清伍良佐等出寨殺  
獲四十餘級知縣張國器乘機督同典史洪益千戶劉冕  
百戶王永爵龐人傑等統兵夜抵竹源寨生擒雷子際等  
十二名斬獲黃應任等三十餘名及俘獲賊屬四十六名  
並其牛馬稻穀入於官自是竹源寨獲平新會志

秋順德大水傷稼順德志

二十九年春正月賊劫三水庫三水志

時正月十九夜水賊突逾城劫庫兵無所措逾年始獲賊

於梧州三水志

三十年春三月順德雨雹大如拳順德志

五月清遠峽山崩清遠志

秋九月颶風傷稼順德志

海寇何亞八率彝人入寇東莞所千戶萬里守南山煙塹遇  
賊戰死後指揮使李茂材率官兵剿之新安志

三十一年春嶺西賊首譚進等劫掠新會得行登名古博石  
碑等都據白石型之險官軍討之無功而還乃招撫進等安  
插於古勞宅村碌子坑聽招之後仍復為盜不時出沒皆屯



劉五城逕或石壁光嘴等山

郡國利  
病書

新會盜李潮興等起

新會志

是時賊首李潮興投石鼓寨自稱兵備上橋聞元亮自稱山西侯會黃九自稱都堂石鼓鄧汝安自稱知府冷水坑葉尾自稱把海指揮筋竹坑李以祥張邊宋子嘖楊逕白千富郡國利病書各立名號互相應稱聲勢聯絡聚眾四千有餘立寨八十有七晝夜流劫提督軍務都御史應檣巡按御史郭文周議行征剿兵備僉事杜聰目覩賊勢猖獗恐難成功計誘李潮興何老貓數賊解報厥議遽寢民失所望嗣後盜賊得志黨類益滋已而里排蔡基等具呈當道委官緝弭卒未能靜

新會志

三水扶羅山賊出掠及西北疆諸村

三水志

五月盜劫清遠縣庫

清遠志

是年海寇自太平口入順德縣乘不備劫庫而去

順德志

三十二年順德歲大饑

順德志

新會雨血

郭通志

八月三水華山井變

三水志

華山洗鉢泉甘清香冽烹茗最美是年中秋水色變赤腥氣逼人三日乃復至九月羅山賊出搶船突至胥江焚劫三日而去

三水志

嶺西賊劫掠平康等都僉事杜聰遣兵戰於北獵山破之

郡國利病書

五月西賊流劫平康諸都賊首何老貓再寇會甯踞北獵山馬騮寨時兵備杜聰駐邑約嶺西兵同進百戶吳世傑



等破賊寨斬首七十級俘獲二十七人奪回被擄三十四名嶺西斬獲稱之越數日於倉步村擒斬賊首何老貓地

方稍安

新會志

是時歲饑盜起猾賊李朝卿假以招撫為名調用於官潛通古兜山寨反為賊耳目璉至縣誘朝卿誅之并戮其黨四十餘人邑人稱快於是賊乃屯於壁山府通判汪應奎署縣事調集兵食出千戶周紹武於獄授以方畧帥官軍民兵二千七百人以往

郡國利病書

清遠池水獠賊亂

清遠志

三十三年春西賊據新會梁金山五坑逕劫掠各鄉官軍討之不克

新會志

時因西賊據梁金山五坑逕劫掠各鄉官兵屢征不克賊

勢愈猖嘯聚壁山僉事杜璉率各營兵往剿有哨官當行而病廣州衛千戶黎輔請代之至壁山與賊戰卻之追至馬牯山賊反攻後援不至輔遂被殺紳士義之欲附祀三廣公祠側為忠義勸當事者難之遂寢

新會志

新會颶風大雨城內外水深四尺

新會志

海賊陳文伯作亂

新會志

先是外海村民陳文伯等以報效為名自備工食充打手總甲有司信之每戰繫白帶為先鋒謂之白帶義勇謝邊有奸吏謝大用為賊首作亂文伯協同五坑逕鬼子窟等營破之於金雞頭大山斬大用已而平康之樓岡民何二與鄭清等為盜據天潭文伯帥兵又破之斬何二累以功自矜癸丑大饑文伯煽動饑民為亂擁眾海上肆行劫掠



官兵捕之反為所殺郡國利病書

時署新會縣事廣州通判汪應奎以饑民自癸丑謀亂因榜諭大書曰饑餓事小梟首事大民畏而沮乃為罷無益之費民稍蘇息乃令人齎榜往諭再四文伯不聽應奎亟召各都鄉老沿鄉宣諭禍福民皆改圖惟古鎮囚其百戶尙瓊應奎陰令百戶吳相以計斬賊首惡二十八人從亂者稍息於是具戰艦募運艘命典史馬卿造神機銃螺螄箭及諸戰具調選精卒一千六百人會諸邑兵五千有奇授以方畧擊文伯於海上文伯中銃死追至黃洋羅州灣連破之獲文伯屍及其母妻斬賊黨一百五十級有奇墮溺死者三百餘人餘黨奔潰遂釋脅從及自首者謝孔文張仕龍等百人乃招諭良民復業未幾餘黨復起應奎又

設策剿平之新會志

三月三十日巡撫御史郭文周題據分巡嶺南僉事杜璉查勘得廣州府屬會甯二縣除賊巢小者未計其大者如石鼓茅舍苔村石山型崗橫嶺連塘羊公逕那西瓜上崗飯籬岡雞頭懷甯等寨賊首李朝真陳孔榮陳赦林紹統計君祿白子富林蝦等所統賊眾約四千餘且與嶺西之恩平新興陽江等縣巢穴相聯盤據流劫節年為害不時突越擾掠東莞順德等縣地殺人市威捉人取贖霸踞山地分列頭目僭稱侯將霸王等號擅竊服飾置造兵器攻劫鄉村流毒一方有不忍言深求病源蓋如昔人所謂盜賊日熾由於招撫太濫近禍未艾往鑒可徵故不敢為再撫之說以誤地方今會甯之民莫不望大舉征剿以快一



朝之忿疏上奉旨準行已而提督軍務兵部右侍郎兼僉都御史談愷會同總兵官分定哨道行委兩廣三司等官

監督總領刻期抵巢進剿

郡國利病書

海寇何亞八徐銓等作亂提督侍郎鮑象賢討平之

郭通志

何亞八鄭宗興等潛入大坭國糾合番船駐廣外洋沿海鄉村大被剽掠復往福建集叛亡數千與王直徐銓方武等合流劫浙江諸郡尋回廣東象賢命巡海副使汪柏督指揮王沛黑孟洋等往捕獲亞八等於廣海俘斬一百四十六人溺水燒死甚眾餘黨散走而徐銓方武等自福建至潮為孟陽所破斬銓海上廣潮雷瓊海先後擒戮賊黨一千二百餘人磔亞八宗興等於市海島稍清

郭通志

初海南有天妃廟凡放洋往還皆敬事之且降箕神驗亞

八欲寇廣州城往禱令二童子扶箕久不降亞八躬身拜告禱乃降書一死字亞八大怒斷神首并執二童子殺之其黨知其必敗矣比行所居大舶包以牛革用防官軍潛鑿故是舶定每聞鑿聲曉霧溟濛天明不霧及兵至猶以為所遣賊徒得掠而歸遂至於敗亞八東莞人

郡國利病書

清遠志

三水西山賊流劫胥江

三水志

三十四年乙卯正月至四月不雨

新會志

新會縣知縣熊坦竭誠露禱雨遂霑足是年大稔

新會志

夏四月從化大雨雹

從化志

冬兵備畢竟容征新甯石鼓上橋賊

新甯志



十二月晦日無光變青紫色有黑氣如盤飛盪滿天郭志

三十五年春正月提督御史談愷乃舉大征出師敗賊於石

鼓又敗之於關村以至牛角型懷甯古餘入於巢窮追於山

破寨二十有奇斬獲萬級有奇餘悉面縛以降復命撫之郭志

志

三十五年正月十四日下令誓師啓行分爲嶺南嶺西二

哨西哨出恩平新興南哨出新會新甯越十九日兵備副

使畢竟容率會甯之兵駐節境上以便宜行事叅將鍾坤

秀統兵一萬自南海直抵新會壁山寨都指揮王麟統兵

一萬自石門直抵苦草逕又分左右翼一略百峯十二寨

一略石鼓十五寨旁午移兵攻黃泥磨下寨殺獲五千餘

級夜進茅舍梅樹崗殺獲百餘級獲財畜甚多賊大敗突

圍走牛角型乘勝又獲三百餘級俘獲賊屬一千餘名越

數日屯營督哨搗巢甫一月計八百餘級惟時土民利賊

貨貨子女乘機窩藏竟容偕汝珪出令許殺獲解官準罪

自是窩家懼各生縛賊首會王狗鄧汝安劉維宗解報官

兵又追殺賊首余五雷世雄等一百餘級間有隱蔽殺死

者不可勝計三月初三日王麟進剿盈崗大塘諸寨鍾坤

秀進剿那西上橋諸寨又自牛眠沙進剿苔村懷甯諸寨

所向無阻惟上橋諸寨賊乘夜潰圍入那西諸山於時山

溪險絕草蔓蔽寨追曉追捕無獲次日王麟移兵羊公逕

三合水鍾坤秀移兵那西身先士卒各有所獲已而軍門

分委通判汪應奎下縣發奸摘伏治之如法其爲人所誣

者亦盡開釋六月十二日班師十一月間乃有賊首陳赦



朱仕靖風擺柳劉不憂等一百餘名竊據大隆百峯諸山  
出沒為患劫擄新會遠近復震知縣潘相乃令相時緝捕  
生擒賊首朱仕靖又用誘計生擒陳赦解赴軍門前後獲  
賊黨一百餘人渠魁相繼就縛於是新甯乃平郡國利  
病書

夏四月順德颶風傷稼順德  
志

是年三月羅山賊掠胥江營於獨樹岡

三十六年春二月順德兩雹大者如鷲卵順德  
志

新會古勞都大雨雹形如甌石傷人畜壞廬舍阮通  
志

三月羅山猺亂提督侍郎王鈞討平之郭通  
志

大小羅山接壤清遠四會懷集諸處出沒無忌侍郎談愷

集兵七萬分嶺西嶺南二道進討會愷勒致仕南贛都御

史王鈞加秩代愷遂領其眾俘斬八千六百餘人郭通  
志

夏六月順德香山地震順德香  
山志

秋七月新會地震新會  
志

八月順德黑雉見順德  
志

三十七年春三月順德旱蝗傷稼順德  
志

秋七月順德香山地震順德香  
山志

十月倭自廣州入寇惠來潮州  
志

賊掠三水西南三水  
志

三十八年夏三水大水三水  
志

東莞兩雹大如鴨卵東莞  
志

三十九年三水有雩三水  
志

二月廣州河南民黃世綱一產三子阮通  
志

六月香山新會等縣地震有聲明典  
彙



秋順德大旱順德志

十月賊劫增城縣庫增城志

冬十一月礦盜起從化志

礦盜招集河源英德賊首李亞元等聚眾至三萬餘徒禍徧廣韶惠三府殺擄男婦至萬餘口從化志

行均平法南雄志

嘉靖中潘季馴巡按廣東行均平里法廣人大便臨去疏請飭後至者守其法帝從之潘季馴傳

御史龐尙鵬上條編法郭通志

按條編法令通行天下民皆稱便浙江各府立祠祀之廣東會城有永賴祠歲時登享郭通志

四十年夏五月赤虹二道自西北貫東南郭通志

八月增城土賊合東莞賊掠城中增城志

是日天明城啟賊眾鳴鑼而入恣劫掠至午有百戶張震自石灘營統步卒三十餘人奮擊殺賊首二人賊勢始潰至望州岡麻車鄉民邀擊獲賊十之一餘眾竄逸後皆追捕置於法然當時之屠戮慘矣增城志

東莞大饑東莞志

四十一年龍門水源長吉賊發蜈蚣藍漢帽子峯諸盜黨遂倚附為亂勢益猖獗龍門志

海賊從太平口劫順德縣庫知縣李有則作木柵於海口守以戈船順德志

四十二年三水新會大水三水新會志

八月盜擾新會採訪冊



賊首羅獨拳周高山梁裕等千餘眾劫掠沙頭越入輔城肆行殺擄先是攝縣推官李有年賦民錢養民守城號李家兵賊至皆潛匿里老泣請發兵李大詬曰汝盜殺汝民於推官何與吾所養者李家兵非汝兵也閉門不出盜踞沙頭幾一月民乞救於上官以推官周標代之民心始定會主簿鍾器至器有智畧領卒擊賊郭中獲安尋招鄉兵議剿給諫陳吾德復以江西鄧子龍至子龍善刀馬閑戰陳羣盜畏之時倭寇厓門當道檄指揮陶燦同子龍禦賊倭遁去既而倭逼新甯子龍馳赴新甯擊走之新甯志

四十三年正月雨至八月番禺志

新會縣賊馮亞乙率黨據九逕新甯志

四月潮州柘林海兵叛犯廣州提督侍郎吳桂芳討平之郭通

志

時倭寇潮州海兵餉不時給遂稱亂犯廣州總兵湯克寬禦之為所敗焚戰艦殆盡大肆殺掠而去桂芳聞變陽招而陰圖之移檄調舟師一自內海出一自外洋入表裏夾擊斬首千餘級郭通志

兩廣都御史吳桂芳進鮮芝續通考

四十四年二月猺賊石國廉等流劫清遠吉河滘江等鄉殺擄人民官兵甚眾是年七月兵備道劉穩招撫回山清遠志

夏四月新安大旱新安志

四十五年春正月日中有黑子大如卵摩盪五日乃滅順德志

二月俞大猷討廣東賊大破之明史世宗紀

賊據河源龍川翁源英德從化和平六縣地為巢二百餘



所眾約四萬附近郡邑千里之間屠戮焚掠慘不可言時賊食盡且死大猷不亟殄餘黨輒置酒高會遂稱病班師賊得逃回屯聚復有萬曆三年之役人以此咎大猷云郭通志

是時用兵調廣西鎮將援剿其督兵則瓦氏也因夫故男幼與叔爭襲故自秉節入龍門守道郭應聘監軍出奇制勝大破賊擒賊首鄧廷鳳斬之俘戮無算餘黨復逃匿山

峒間龍門志

夏順德蟲傷早稻順德志

秋七月順德水大至米價騰踊歲饑順德志

八月兩日相鬪新會志

盜劫都會新會主簿鍾器追擊走之新會志

嘉靖末香山黃梁都土寇結倭寇為亂禍甚慘至萬曆間乃

定香山志

穆宗隆慶元年春增城雨雹增城志

長甯水源寇起龍門志

峒賊復亂聚黨千餘屠掠村落無虛日巡道何子明督剿調高州倅張大亨署龍門令專征連增城從化河源兵分道竝進鐵岡義勇黃茂光散財募勇士親為鄉導衝鋒破賊官兵乘勢而前遂擒賊首劉尚德潘善興等餘黨悉平茂光亦戰歿自是數十年龍邑稍安龍門志

海賊會一本入寇官軍追剿至雷州港守備李茂材死之新安志

冬十二月新安地震新安志



新甯增城饑新甯增城志

二年春正月十七日從化松子寨山寇大掠增城知縣張孔修率士民登城守寇不敢犯增城志

二月順德新會雨雹順德新會志

六月廣東賊會一本寇廣州殺知縣劉師顏穆宗紀

一本寇廣州詔切責張瀚停總兵官俞大猷郭成俸張瀚傳

十一月命廣東福建督撫將領兵會討會一本穆宗紀

時海寇會一本倡亂閩廣廷推劉燾總督兩廣軍務給事中鄭大經疏言頃皇上以兩廣用兵特簡劉燾為總督顧今所患不在無燾而在任燾之未至耳臣謹條上六事曰重事權久信任寬文法聽委用廣招徠厚賞格此皆所以委任將帥而責成功也吏部覆謂兩廣經略事宜悉如大

經言而廣福接壤為唇齒之地宜令燾兼督福建軍務庶

事權歸一易於成功明典彙

三年從化礦盜餘黨復起從化志

礦賊萬尚欽唐亞六張廷光等復四出流劫勢張甚突寇城下值城上人善射從東門發二矢賊應弦而倒勢稍卻而城外居民已殺掠不可勝紀矣從化志

夏六月順德香山颶風大水壞民居順德香山志

八月廣東賊會一本伏誅穆宗紀

官軍討一本三年不克至是會閩軍討平之總兵俞大猷參將王詔功居多郭通志

九月大風拔木西樵山大雪林木皆冰二日乃解郭通志

十一月新甯知縣朱世隆招撫九逕賊新甯志



奸民湯惟蛟伏誅採訪冊

番舶泊厓門祠廟數為穢瀆奸民多掠良家子女賣之湯惟蛟兄弟其首也至是新會知縣林會春請之上官悉逐番舶收惟蛟兄弟置之法民患始息新會志

四年正月倭入廣海衛城穆宗紀

先是倭寇二百餘從西海登陸寇海晏雙門諸村謫戍奸人朱衣盧榮等怨衛所官遂構藤崗賊邱樂開輩五百餘人連倭攻城值旗軍上梧州班正月六日五鼓衣滅火殺人賊從城西南入千戶甯紹傑棄城遁指揮王正鎮撫周秉唐戰敗死之百戶何蘭亦力戰死郭通志  
二月肇慶府同知郭文通帥師追倭於廣海敗績郭通志  
倭據廣海衛四十六日殺戮三千餘人官民房舍焚燬殆

盡比退文通督狼兵浙兵追之兩軍不和故敗績新會縣知縣林會春奉檄勘驗招集流亡請糧賑濟收瘞枯骨民甚德之郭通志

順德香山雨雹順德香山志

鹽牛賊圍劫三水白坭三水志

鹽牛賊者東新二邑之私鹽徒也上江則載私鹽下江則劫掠於是年二月初十辰登谿陵岡劫鄉民鄧義邦其徒數百知縣周督官兵至以賊徒盛不相加鄉民懼逃賊住三日而去三水志

倭寇流劫新安鄉村百戶吳綸率鄉兵戰死新安志

十月新會縣賊潘標龍劫新甯矧崗場官唐本達死之新甯志  
五年正月倭攻新甯城不克遂掠矧崗新甯志



新會雨雹

新會志

倭賊攻大鵬所舍人康壽柏禦之

新安志

時所城被圍四十餘日賊具雲梯薄城柏呼眾堅守有登

陴者手刃之即碎其梯圍乃解當道以扁旌之

新安志

四月大水田廬傾沒甚多決壞基圍

順德志

五月清遠地震

清遠志

九月颶風傷禾稼大饑

新甯香山志

十一月倭攻新甯城不克遂掠沙冲獨岡

新甯志

十二月敗倭於那西

新甯志

新甯九逕盜復起

新甯志

順德龍山堡有虎傷人鄉人擊殺於黃村

順德志

六年三月廣州饑

郭通志

七月廣州大水南海尤甚

郭通志

八月從化英德河源賊亂提督殷正茂討平之

郭通志

時從化賊萬尚欽英德張廷光河源唐六皆皆以鹽礦起

流劫鄉村督府李遷調兵一萬二千討之會遷以晉秩去

正茂代董其師斬首六百四十俘尚欽等磔之餘黨悉平

郭通志

九月山寇破矧崗堡

新甯志

十月總兵張元勳征九逕盜十二月招降之

新甯志

流寇許進美劫掠香山古鎮

香山志



南海譚宗浚分纂

南海梁

起初校

順德盧乃潼再校

番禺史悠履三校

順德羅

槩四校

廣州府志卷七十八終



